

BAPTIST CHURH OF MIZORAM

KOHHHRAN

BEIRUAL THUZIR 2025

KOHHHRAN

Beirual Thuzir 2025

Published by the Publication Board

© *Copyright reserved by the Publisher*

Copies: 2,2000

A man: Rs. 40/-



Printed at the Baptist Printing Press, Sêrkâwn 2025
bppsêrkawn@gmail.com

CHHUAHTU THUHMA

Nikum 2024 Beirual thuzirah “Ringtu Nun” tih kan zira. Kumina kan zir atan Publication Board chuan “Kohhran” tih a thlang a. Thupui zir zawm awm tak pawh niin a lang. Rawngbawlinaah ngai-a zirlai thupui ziaktu mi parukte chungah Publication Board chuan lawmthu a sawi a, an thawhrimna leh inpekna hian rah duhawm tak a chhuah ngei kan beisei.

Beirual thuzir hun atan September thla chawhma lama nei tura 2020 Assembly-in a lo rel tawh angin September ni 1 aṱanga September ni 10, 2025 chhung zir tura buatsaih a ni a. Kan lo tih ṱhin angin thu zir hun chhûng hian tualchhung leh bialah programme dang siam lo tura beisei kan ni a. September ni 7 khi Pathianni a ni a, sermon thupuiah “Kohhran” tih hmanga sawi ṱheuh ni se a lawmawm hle ang.

Beirual thuzir hi kan pi leh pute hun laia thlarau purchawkna atana an hmang ṱhin ang khan a zirtu zawng zawngte Lalpa’n thlarau malsawmna vur ṱheuh che u rawh se.



Rev. Lalhmunsanga

Director,

Baptist Literature & Printing Department.



BEIRUAL CHUNGCHANGA HRIAT TUR PAWIMAWHTE

Kum 2025 atana Beirual thuzir bu chu kan lo peih fel leh ta a, a lawmawm hle mai. Kohhran member tam thei ang ber Beiruala tel turin kan in ngên a. Beirual thuzir hun chhûnga kan hriat tur pawimawhte chu hêngte hi a ni.

1. Beirual thuzir inkhawm apiangin ãawngtai rual neih ðhin tur a ni. ãawngtai thupui thawh tur nei tan thuzir hruaitu hnenah ãawngka-in emaw ziakin emaw hriattir ðhin ni se.
2. Pathian ni zing inkhawmah zir tur a hrana siam a ni lo a; amaherawchu, thuchah sawituin thupui siamsa hmang hian thuchah sawi ni se. Thupui tur chu thupui zir dan indawt tihah tarlan a ni e.
3. Beirual thuzir hi tualchhung kohhran tinin ngaih pawimawh tur a ni. Thuzir hun chhung hian bial leh tualchhung kohhran bakah fellowship lam pawhin Beirual thuzir tibuai zâwngin programme dang siam loh tur a ni.
4. Kumin kan thuzir hi kohhran tinah hlawk tak leh phur taka kan zir ðheuh theih nan duhsakna ka hlan che u a, malsawmna kan chan ngei theih nan ãawngtaina nen zir ðheuh turin ka ngen bawh a che u.



Rev. Dr. H. Lalthlamuana
*General Secretary,
Baptist Church of Mizoram.*



A CHHUNGA THU AWMTE

- 1. KOHHRAN AWMZIA LEH NIHNA** - 1
Rev. Dr. C. Lalruatthanga
- 2. KOHHRAN INRELBAWLDAN** - 6
Rev. Dr. C. Lalruatthanga
- 3. KOHHRAN KALPHUNG** - 11
Rev. RC. Lalthanzama
- 4. BCM DIN A NIH DAN** - 17
Rev. RC. Lalthanzama
- 5. BCM DANGLAM BIKNA** - 23
Rev. Dr. F. Lalsangliana
- 6. KOHHRAN-A RINAWMNA LEH NGHEHNA** - 27
Rev. Dr. Lalzarliana
- 7. BCM THURIN HRIATCHIAN** - 33
Rev. K. Lalbiakenga
- 8. BCM INPUMKHATNA** - 39
Rev. K. Lalbiakenga
- 9. BCM RAWNGBAWLNA A TAN HO THIAM** - 46
Upa PC. Vanlalrova
- 10. KOHHRAN LEH THILPEK** - 52
Upa PC. Vanlalrova

THUPUI ZIR DAN TUR IN DAWT

(1st September – 10th September)

Date	Zirlai	Thupui
01.09.2025	Pakhatna	Kohhran awmzia leh nihna
02.09.2025	Pahnihna	Kohhran inrelbawldan (structure)
03.09.2025	Pathumna	Kohhran kalphung principle
04.09.2025	Palina	BCM din a nih dan
05.09.2025	Pangana	BCM danglam bikna
06.09.2025	Parukna	Kohhran-a rinawmna leh nghehna
07.09.2025 (Zing)	Sermon	Thupui: Kohhran
07.09.2025	Pasarihna	BCM Thurin hriatchian
08.09.2025	Pariatna	BCM inpumkhatna (Integrity)
09.09.2025	Pakuana	BCM Rawngbawlna a tan ho thiam
10.09.2025	Sawmna	Kohhran leh thilpek

ZIRLAI PAKHATNA

KOHHRAN AWMZIA LEH NIHNA

Bible chhiar tur: Mathaia 16:17-20, Ephesi 1:22-23

Thuhmahruai: Kan zirlai hmasa ber atân kohhran awmzia leh a nihna kan zir dâwn a. Kohhran awmzia leh nih phung Bible ațanga kan hmuh dân kan zir hmasa ang a, Mizoram Baptist kohhran kan zir bing leh ang.

Kohhran awmzia: Kohhran awmzia hi Thuthlung Hlui leh Thuthlung Thara a lan dân ațangin kan zir ang.

- 1. Thuthlung Hluia kohhran:** Thuthlung Hlui huna 'Kohhran' sawina atâna Hebrai țawna an hman thu mal chu Qahal emaw Edah emaw hi a ni. Qahal tih chu mipui pung khâwm (assembly) tihna a ni a, Edah tih chu inkhawm ho (congregation) tihna a ni. Pathianin hnam thlan atân serhtan thuthlung hmangin Israel-te a thlang a. Chûng a hnam thlante chu Pathian kohhran hmasate, serhtan thuthlung hmanga a koh chhuah leh thlante an ni. Thuthlung Hlui huna kohhran mite chu Pathianin a zâwlnei leh a hriakthih lalte hmanga a koh khâwm, Pathian hmaa pungkhâwm țin̄te kha an ni. Chûng mite chu Pathianin a mite ni tûra a thlante an ni a, Pathianin hnam dangte zîng ațanga a koh chhuah leh thlante an nih avângin Pathian duh zâwn̄g tih leh Pathian duh dân anga nûng tur an ni a, Pathian fak leh chawimawia, a ropuina tar lang tûrte an ni. Thuthlung Hlui Kohhranah chuan Lal thuneihna a awm a, puithiamte hnathawh a awm a, zâwlnei rawngbâwl̄na a awm leh baw̄k a. Pathian enkawl̄na, rorê̄lna leh a kaihhr̄uaina anga kal vek an ni.

2. Thuthlung Thar kohhran: Thuthlung Thar huna kohhran sawina ɬawngkam lẫr tak pakhat chu ‘ekklessia’ hi a ni. Thuthlung Thar kohhran chu Pathian thisena lei leh din a ni. Pathian Fapa mal neih chhun Isua Krista thisen hmanga din a ni. Thuthlung Thar kohhran mite chu ringtu âwm khâwm hote an ni. Chu ringtu awm khâwmho chu Pathian hnathawh chhunzawm tûra inpumkhatte an ni a, Lal Isua chanchin hril tûr leh a hnathawhte chhunzawm tûra Pathian thisenin a kuah khâwmte an ni.

Isua zirtîrte kha hmun hrang hrangah Lal Isua thupêk zâwmin Chanchin Ța hrilin an kal a, Kohhran a ding zêl a. Kristanten tih duhdah an tuar a, hmun hrang hrangah an kal darh a, an kalna apiangah kohhran an din zêl a. Kohhran lo piang zêl chuan mission hna ngaipawimawhin hmun hrang hrangah thawktute tîrin Chanchin Ța hril hna an thawk chhunzawm zêl a, khawvêl hmun hrang hrangah kohhran a lo ding ta a ni.

Kohhran nihna: Kohhran chu Pathian in, Pathian chênna, Pathian chhûngte, Krista taksa, Krista mo a ni a. Chu mai chu ni lovin Isuan amah ringtu awm khâwm, kohhran hote nihna a sawiah chuan lei chi, khawvêl êng ti tein a sawi bawk a ni.

Kohhran hi a neitu chu Pathian a ni a, a dintu pawh Pathian a ni a, a inngahna pawh Pathian a ni. Mihring din a ni lo va, mihringa inngat a ni lo. Pathianin a hmanrua atâna a siam leh a din a ni. Pathian ropuina puan chhuahna, Pathian fak leh chawimawia a awmna, Pathian nihna puang chhuak tûr leh a hnathawhte puangchhuak tûra a din leh a siam a ni. Pathian ta a ni a, a chungah thuneia rorêltu

chu Pathian a ni. Kohhran enkawla, vênga, kaihruaia, tingheta, tipungtu pawh Pathian a ni. Kohhran hi Pathian ta a ni.

Kohhran chu Pathian hnathawh chhunzawm tura din a ni a, inawp khawmna fel tak nei, hotu leh hrulaitu neia siam a ni.

Mizoram Baptist Kohhranin kohhran a hrilhfiáh

dân: Mizoram Baptist Kohhran chuan kan Thurinah hetiang hian kohhran a hrilhfiáh a: *“Kohhran chu Isua Krista’n a thisena a lei, Isua Krista ringtute inpawl ho, Krista taksa a ni tih kan ring,”* tiin. Kohhran chu Krista taksa kan ni a, Krista nena inzawm tlat kan ni. Krista thu kengtu, mi dangte hnêna hlânchhâwng tura koh, ruat leh dinte kan ni. Isuan min hrilh anga Baptisma leh Lalpa zanriah tha taka hmangtu kan ni.

Mizoram Baptist Kohhran din a ni: Mizoram Baptist Kohhran hi January 11, 1894-a din a ni. Hetiang hian Baptist Church of Mizoram Constitution Bung 1, Chang 2-naah chuan a inziak:

“Mizorama Missionary hmasa ber Sap Upa leh Pu Buanga (Rev. F.W. Savidge leh Rev. J.H. Lorrain)- ten January 11, 1894-ah Mizoram an lo thleng a. Kohhran din tûra rawngbâwlina leh hmalâkna zawng zawngte Baptist Missionary Society (BMS) chuan an Missionary leh an Mission hnathawh an pawm tâk avângin Mizoram Baptist Kohhran din ni atan January 11, 1894 hi puan a ni.” tiin. Hei hi Mizoram Baptist Kohhran din tan hunah BCM Assembly chuan a pawm a ni.

Mizoram Baptist Kohhran nihna: Baptist Kohhran chu mahnia ro inrêla kal a ni a. Hei hian Tualchhûng Kohhran mal bik chauh rawngbâwlina a kâwk a, hetiang kalte hian a huhovin chak takin hna an thawk

thei lova, an hmalâkna pawh a zau thei hek lo. Sâp Upa leh Pu Buanga Mizoram chhim lama an rawn luh aṭanga a kum sawmna 1913-ah khan Pu Buangan BMS-a report a pek, Rev. Dr. Raltawnga'n a lehlin dan chuan, *"Helai hmuna kan lo kal chhan hi khawthlang lama Baptist ang tura khawchhak lama mite hi siam turin a ni lova, kan tih tur chu Krista hnena hruai phawt a, anmahni hnam kalphung mila Lushai Pathian kohhran chak tak din tura kaihhruai hi a ni. Chu kohhran chu Chanchin ṭha thiltihtheihna lantirtu leh hriatpuitu, hnam kawlhse tak, mi thianghlim ni tura tidanglamtu leh mi lu lâk chingte thlarau bo mantu ni tura buatsaih hi a lo ni dawn a ni. Lushai kohhran chu Baptist, Presbyterian leh Methodist kohhrana thil ṭha berte ngeth taka a inhlâwmkhâwmna a lo nih hun leh khawthlang lam kohhranten an pêk theih loh thil ṭha dang tam tak awmna a lo nih hun hi nghâkhlel takin kan thlir reng a ni,"* tiin a ziaak a ni.

Mizo mipui mil zawng takin, an hma thlir chu an hlen a, a mal tē tēa awm lovin hmun hrang hranga zofate chu kohhran pakhat Mizoram Baptist Kohhran-ah min siam a ni. Chumi awmzia chu, Mizoram Baptist Kohhran chu taksa pumkhata pêng tam tak awm ang hi kan lo ni ta a, a mal tē tēa awma eng tham ni lo tûr kha zawm khâwma awmin kan chakna leh thiltihtheihna chu thahrui chak taka siamin thil ropui, hlu leh ṭha tak tak, kan mihringpui, min hual vêltu (environment) leh kan Pathian tana hman tlâk leh rin tlâk ni turin min siam a ni.

Tlangkawmna: Kohhran chu Krista taksa, Pathian thisena a leite kan ni. Ringtu awm khâwm, tum bîk neia intêlkhawmte kan ni a, Krista duh zawng ti tura a thisena leite kan ni. Pathianin hnam hrang hrang min din a, kan hnam leh awmna hmun mil zelin kohhran

min dinsak a, Mizoram Baptist Kohhran pawh a mi thianghlimte hmangin min din a, kan nihna nena inmil takin Lalpan min din a, chak tak leh khawvela kohhran leh ringtu dangte hriat pawha mawi tham ve tûrin min din a ni.

Sawi ho tur:

1. Kohhran awmzia leh nihna kan tarlan bak aţang hian kan hriat ang angte sawi ho ni se.
2. Mizoram Baptist Kohhran, hmun danga Baptist Kohhran aia kan danglam bikna  ha kan tih te sawi ho ni se.



ZIRLAI PAHNIHNA**KOHHRAN INRÊLBÂWL DÂN**

Bible chhiar tur: Tirkkohte 6:1-7, II Korinth 11:12-15

Thuhmahruai: Kohhran hi awmze nei lova kal a ni lo. A dintu Pathianin fel takin a kohhrante kal dân tûr a ruahman sak a ni. A chhunga chêngten Pathian duh dân angin kalpui zo thîn lo mah ila, a neitu Pathianin a enkawlin a vêng tlat a, kal sual leh tih sual châng nei thîn mah se Kohhran chu a neitu Pathianin a tung dîng a, a siam tha a, a vêng him leh thîn a ni. Kohhran inrêlbâwlna kan zir dawn a, kan Constitution leh Rules kan neihte chu a bua chhiar theihin a awm vek a. Kan zirlaiah hian Bible-a kohhran inrêlbâwl dân leh Baptist Church of Mizoram inrelbawl dân tlangpui kan zir ho dân a ni.

Bible-a kohhran inrêlbâwl dân: Thuthlung Hlui huna Pathian kohhranho inenkawl dân leh Thuthlung Thar huna Pathian thisena lei kohhranho inenkawl na hian danglamna tam tak a nei. Thuthlung Hlui hunah kha chuan Lalpan a mite kaihruaia enkawltu tur mipui kaltlang lovin, amahin a ruat mai a. Rorêltu, zâwlnei, lalte leh puithiamte kha, Lalpan mipuite kaltlang lova a thlan vek a ni. Rorêlna leh thil awm dân tûr pawh a duh anga kal turin a hrilh a, chutianga awm lo chu an aiawhtu tur mi dang a thlang mai thîn. Isua thawhle hnu, Thlarau Thianghlim thlen hnua kohhrante erawh chu enkawltu tur mipuite kal tlanga thlan leh ruat an lo ni ta a. Kohhran inrêlbâwl na pawh kohhranin a ruat leh thlanten an enkawl ta a, mawhphurhna hrang hrang kan lo insemin ta thîn a ni. Kohhranin a thlang kan tih hian kohhran kha Pathianin

hmanruaah a hmang a, a thlangtu leh ruattu chu Thlarau Thianghlim a ni. (Tirh. 20:28) Thlarau Thianghlim chu Pathian a ni. Chanchin Ṭha hril leh inenkawl̄na fel tak neia kal kha an tih dân a ni. (Tirh 6:2-4) Hemi zulzui hian khawvela kohhran hrang hrangte chuan inenkawl̄na mahni ṭha tih dan angin kan kalpui ta a ni.

Mizoram Baptist Kohhran inrêlbâwl dan:

- 1. BCM din dan:** Mizoram Baptist Kohhran hi Baptist kohhran zîngah hian danglam taka din a ni a. Khawvêla kan unau Baptist kohhran dangte ang lo takin Pathianin a mi, Sâp Upa leh Pu Buanga te hmanruaa hmangin a din a ni.

Kan Baptist-pui, khawvel hmun hrang hranga awmte nêna kan inan lohna leh chu kan inan lohna kan ṭhatpui em em si chu; a mal tê têa, a hrang thliah thliaha awm lo va, Baptist kohhran pakhata kan inthlun zawm a, kan awm khâwm vek hi a ni.

Zân hmasaa kan zir tawh ang khân, Pu Buanga khan, *“We are not here to make Eastern duplicate of Western Baptist,”* tiin 1913-a Baptist Missionary Society, London-a report a pek khan a sawi a. “Khaw thlang lama Baptist kohhran kal dân ang diak diaka Baptist kohhran din turin khaw chhak lamah hian kan lo kal lo,” a tihna a ni ber e. Chuvâng chuan kohhran pâwl dang dangte kalphung ṭha leh keini zofate tâna ṭha ber tur, kan hnam leh nunphung mil thei ang ber tur nia an hriat hmangin inrêlbâwl̄na, inenkawl̄na leh inawpkhâwm dan tur min siam sak a. Hei tak hi keini Mizoram Baptist Kohhrante hian kan chian a pâwimawh takzet a, mahnia awm hran duhna emaw, khawvel hmun danga Baptist te anga

Tualchhung kohhran mahnia ro inrêl (Autonomy of the Local Church) hi kalpui tum tlat tûr kan nih lohzia kan inhriat tlat a pawimawh takzet a ni.

2. Inrêlbâwlina danglam bîk: Kan unau khawvêl hmun danga Baptist awmte chu Tualchhûng kohhran mahnia ro inrêl (Autonomy of the Local Church) an ni a. Mizoram Baptist Kohhran erawh chu chutianga kal ve lo chuan kan inzawmkhâwm vek a, mihring taksa ang mai hi kan nihna a lo ni ta a ni. Kan taksaa peng zawng zawng hi mahnia awm hrang thei lo an ni vek a, inzawmkhâwma thiltihtheihna nasa tak nei, tha taka hna thawk thei a ni ang hian, Tualchhûng kohhrante hi hmun khatah, hming pakhat neiin 'Mizoram Baptist Kohhran' tia kohin kan lo awm ta a ni. Chuvang chuan, Mizoram Baptist Kohhran chu khawvêla kan unau mal tlata kalte nêen kan inrêlbâwl dan hi inanga ngaih tur kan ni lo va, chutianga kal tum tur pawh chu a ni lo a ni. Min dintuten min din dânah a mal tê têa awm lova inzawm khâwma, hna thawk hova, chak taka kal thei turin min din a ni.

3. Nghet taka inthlunzawm: Mizoram Baptist Kohhran chu Tualchhûng, Pastor Bial, Area Baptist Council leh Assembly thlengin nghet takin kan inthlûng khâwm a, 'tui mal far te tein tuifinriat a siâm' an tih ang maia hmuhnaawm thamin kohhran tê tak tê tete leh kohhran liante kan inphuar khawm a, kan luang chhuak a, mi tam tak tana malsawmna ni thei khawpin Lalpan min hmang mêk a nih hi. Hemi chhûnghah hian committee pêng pawimawh tak tak, department hrang hrang enkawltu a awm leh a (Hengte hi BCM Constitution leh Rules-ah te Chiang taka zia a ni), rorêlna fel leh inkaihhruaina tha tak nêen BCM hi Lalpan min kalpui mêk a ni.

Tualchhung kohhran tinten rorelna hrang hrang thuchhuakte kan ngaipawimawh tur a ni; roreltute thu zâwm turin kan Pathian Thu pawhin min zirtîr alâwm (Rom 13:1).

4. Pakhat kan nihna hi kan chakna a ni: Baptist kohhran hmun danga awmte chu mahnia awm an nih hlawm avângin ram pakhatatah Baptist kohhran awm ðeuh mah se an chak lova, thil an tithei tak tak lo. Mizoram Baptist Kohhran erawh chu khaw hran hrana awm ni mah ila, pakhat, hming pakhat pu, 'Mizoram Baptist Kohhran' kan nih tlat avângin chakna thahrui kan ngah a, thil tih theih loh tûra ngaih pawh titheiin Lalpan min siam a. Kan chakna thahrui infin khâwm chuan thil ropui tak Lalpa tân a tihtheih phah a ni.

5. Inrêlbâwlina ðha chu mawi takin a lang chhuak: Khaw hrang hranga awm Baptist kohhran, hming pakhat Mizoram Baptist Kohhran pua kan awm khâwm a, taksa pakhat anga kan chetna mawi takin a pâr chhuak a ni. Pakhat ni chung a lungrua taka kan thawh hona chu hla tak aţang pawha hmuh theihin a par mawina leh rimtuina a lang chhuak a, hmun hrang hrang aţangin kan Baptist unanten kan tih dân ðha an rawn zir a, kan kal dân anga kal hi an châk ve ngawih ngawih a ni. A tîr aţanga kal an nih ve loh avângin kan inrêlbâwlina chu awt hle mah se an kalpui hlei thei si lo.

Tlangkawmna: Kohhran chu tih tur neia din a ni a, Pathian duh dân anga kal tur a ni. Awm hrang thlih thlih turin Pathianin BCM hi min din lova, hmun khata awm khâwm a, a tâna chak taka thawk thei turin min din a ni. Member tam leh member thilpêk pe tam thei kohhran nih chu a nuam ang, mahnia awm hran

mai pawh a châkawm mai thei. Mahse Lalpan BCM min din dân hi a dang tlat a, inchhawmdâwl tawn a, ințanpui tawn tûrin min din a ni. Mahni hmasial takin tute mah kan kal a rem lova, hlim taka thawk hova, Lalpa ram tâna țang ho tur kan ni e.

Sawi ho tur:

1. Sâp Upa leh Pu Buangatena Mizoram Baptist Kohhran kal phung tura min siam sak inzawmkhâwma, hmun khata awm tlânga kohhran min din sak hi a hlutna kan hriatte sawi ho ni se.
2. Kan inrêlbâwlna hi nghet leh zual leh chak zawka kan kalpui theih dân tur sawi ho ni bawk se.



ZIRLAI PATHUMNA

KOHHRAN KALPHUNG

Bible chhiar tur: Matthaia 28:18-20; Rom 12:3-5.

Thuhmahruai: Khawvelah hian kohhran tia sawi, pâwl tam tak an awm a. Mizoramah ngawt pawh hian kohhran anga sawi, kohhran zia phur chhuak zo lo tam tak an awm. Kohhran hian zirtîrte hun aţanga vawiin thleng hian kalphung nghet tak a nei a. A anpui, a hrûla kal, mi tih ang thenkhat ti ve chung si a kohhran nihphung phâk lo an awm fo. A tira thlarau mi leh chan sân hmêl angrengh tak, an chanchin chhui chian tlâk loh kan nei fur tawh a nih hi.

A eng chin hi nge kohhran tia kan chhiar dâwn tih kan hriat thiam theihna turin kohhran kalphung, hmanlai aţanga an lo pawm tlatte kan târ lang ang. Tunlaiah rawngbâwl pâwl hrang hrang kan din sup sup a, hming mawi tak tak inphuahin programme lian tham tak tak an buatsaih a. Mahni lâwina kohhrana ţangkâi tumna nei mang lo, chutiang thil tihnaa inhawlh lawr tak tak an awm bawh. Hêng pâwl hrang hranga kan inhmanna hian kohhran ngaihhlutna a tihtlâk hniam chuan kan dinna mual a dik lo ţan tih inhriat bawh tur a ni.

Kohhran dik nihphung: Apostole-te thurinah “*Mi zawng zawng tân kohhran thianghlim awm hi ka ring a, Mi thianghlimho inpâwl khâwm hi ka ring*” tih a awm a. Isua Krista taksa, a thisena a tihthianghlimte inpawlkhawmna, kohhran thianghlim chu Isua Krista Lalber a nihna hmun, hêng a hnuaia nihnate keng tlattu a ni.

- i. **Pumkhatna:** Kohhran pumkhat nihna hi kan thurin leh tihdan inan vâng a ni ngawt lo a, Krista lû-a neih vâng inpumkhatna a ni. Khawvel ram hrang hrangah awmin inrêlbâwlâna hrang kan nei theuh a, Pathian chibai kan bûk dân pawh a inang hek lo. Lalpa pakhat, rinna hmun khat, baptisma hmun khat niin Isuaah kan inthlung khâwm vek a ni.
- ii. **Thianghlimna:** Kohhran member-te chu Krista thisena tihthianghlim tawhte an ni a. Pathian tâna serh hran, tihthianghlim an ni. Kohhran inkaihhruaina chuan nun thianghlimna lam a hawi tlatin, a member-te nun dân pawhin thianghlimna a pho chhuak tûr a ni. A chhunga mite nun thianghlimna zârah kohhran pawh a lo thianghlim dâwn a ni.
- iii. **Huapzo:** Kohhran hi mi zawng zawng tâna Pathianin a din a ni a. Chi tin, tawng tin, hnam tin kan leng vek a, kohhranah chuan kan vâi hian dinhmun inang vekah kan dîng a ni. Chi avâng te, dinhmun avâng te, awmna hmun avâng te a inthliarna a awm tûr a ni lo. Hnam duhsak bîk neih a rem lo a, chi inthliarna lam hawi rêng rêng a leng lo a ni.
- iv. **Apostol-te zirtirnaa inngat:** Isua zirtîrna ngaithlaa midangte hnêna zirtîr chhâwngtute chu Apostol-te an ni a. Kohhran thurin chu Isua zirtîrna, Bible-a Apostol-ten an zirtîrnaah a inngat tûr a ni. Krista Isua chu a kila lung pawimawh ber niin, tirhkohte leh zâwlneite lungphum chung a rem chhoh nihna chu kohhran nihphung tûr a ni.

Kohhran kalphung langsâr zual te: Kohhran chu rinna hmanga Pathiana zung kai tlat, Pathian thu nghet

taka pawm leh òan tlat, Pathian chibai bûkna chhawm nung reng, Isua a laipua dah reng chung a inawpkhâwmna hmun a ni a. Kohhran nihphung hloh lo mah ila kan awmna ram leh hnam zia azirin kan uar duh lai emaw tihdan emaw a danglam hlek hlek thei a. Kohhran duhawm zâwk kan nih theihna turin kohhran kalphung langsâr zual chauh kan tarlang ang.

- i. **Pathian thua innghat a ni:** Miten Pathian duh zâwng an hriat a, an nunpui theih nân Pathian thu zir chian, miten an hriat theihna tûra puan chhuah, an nuna an hman òangkâi theihna tûra hriat fiahtîr hi kohhranin a tih ngei tûr a ni. Kan thuchah puan chhuah leh inzirtîrna pawh Pathian thua innghat leh nun tak nei tura kaihruaitu a ni tûr a ni.
- ii. **Pathian fakna hmun a ni:** Thinlung taka Pathian fak leh chawimawina hun leh hmun buatsaih hi kohhran tinin an tih ngei tûr a ni. Kohhran chu rimawi, òawngtâina leh inpâwlhona hmanga miten Pathian chibai bûkna nung an neihna hmun a ni. Pathian fakna nung nei tûrin Pathian fakna hmanrua changtlung tak neih hi ngaihpaawimawh bawh tûr a ni.
- iii. **Hruaitu òha an nei:** Kohhran inrêlbâwlina leh inawpkhâwmna òha nei tûrin Pathian òih mi, hruaitu òha leh inpe neih a ngâi. Kohhran chu entawn tlâka nung zahawm, mi invawng thianghlim, rinna nghet taka vuantu ten an kaihhruai thîn. Kohhran member-te tâna inhawng leh midang ngaihsak kawnga taima tak hruaitu neih hi kohhran nihphung duhawm tak a ni.

- iv. Rinna an vawng:** Mi malin Pathian chhandamna a chan theihna tûrin rinna a ngai a. Rinna bawk chuan Pathian tân, thil ̣ha ti tûra pen chhuak ngam turin huaina min pe a. Mahni âwm mêk dan aia Pathian thutiam thlîr chung a beiseinaa kal tûrin rinna chuan chakna min siamsak a. Kohhran chuan rinna pawimawhzia a zirtîrin Pathian ring ngam tûrin midangte a pui ̣hîn.
- v. Inpumkhatna leh lungrualna:** ̣anhona leh inlungrualna hi ̣ha tih zawng inan vâng te, duh loh zawng inan vâng te pawhin a awm thei a. Kohhran inzirtîrna chuan kohhranho chu a tilungrual a, thinslung inpawh taka a huhova hma la thei tûrin a ̣anpui ̣hîn. Pathian thlarau zârah hnam leh ̣awng chi hrang hrang te chu induhsak leh inhmangaih tawn tûrin a tanpui ̣hîn.
- vi. Mi tin a hmang ̣angkai:** Kan awm min hriatsaktu an awm lohna, kan ̣angkai ve ngai lohna hmun chu a nuam ngai lo. Kohhran chuan mi tin ̣angkai taka hmang thei turin theihna a nei a. mize inang lo, thiam zâwng leh ̣angkai dân inang lo tak tak te hi kohhranah chhan nei vekin kan awmkhâwm a. Chung mite ̣angkai taka lo hman chu kohhran mawhpurhna a ni.
- vii. Chanchin ̣ha hril:** Khawvêl zawng zawnga kal a, thilsiam zawng zawngte hnêna Chanchin ̣ha hril turin Isuan min duh a. Chanchin ̣ha hril thei kohhran ni tûrin member-ten sâwma pakhat kohhrana pêk an ngaipawimâwh tûr a ni. Kohhran chuan hmun hla zawka Chanchin ̣ha la hre ngai lote Isua hnêna hruai tumin ruahmanna a siam ̣hîn tûr a ni.

viii. Mi dangte ṭanpui leh ngaihsak: Kohhran chuan member-te a ngaihsakin tisa leh thlarauva an ṭhan theih nân a pui ang. Kohhran chuan a member-te chu an in lam thlengin a ûmzûi tûr a ni. Mi tâna harsatna leh phurrit siamtu ni lovin, chanhai leh chhuanchham a dâwm kâng ang a, taksa leh rilru lam thlenga harsatna tâwkte ngaihsak tûrin ruahmanna a nei tûr a ni.

ix. Zirtîra siam: Thlarau bo chhandamna leh midangte ṭanpuina hi rawngbâwlâna pawimawh tak a ni a. Chutih lâiin Isuan thu min pêk angin kohhran chuan zirtîra siam hna a thawk ang. Member-te chu ringtu puitling an nih theihna turin Pathian thu sawi bâkah inzirtîr kan ngai a. A huhova thu zir theihna tur hunbi ruatin, zirtîra siam tumin ṭan a la tûr a ni.

x. Kohna phua rawngbâwl: Kohhran chuan hruaitu nei mah se hruaitu mi mal duhdân anga hmâ la tur a ni lo. Thutlukna a siam rêng rêngin Pathian tihlâwm tumin, Pathian mit hmuha lawm tlâk leh ṭhat famkim chu a tum ber a ni tur a ni. A hma lâkna tinrênga fîmkhurin a duh uluk ang a, mi mal hamthatna leh ngaih dân aiin Pathian duh zawng a dah hmasa ṭhîn ang.

Tlangkawmna: Kan awmna vêng leh khua ṭheuhah kohhran tia sawi, kohhran nihphung phawk pha lo an awm ang. Heng mite hi kan vei a ngai a, pâwn lam aṭangin an kalphung kan va tihdanglam sak thei lo ang. Kan huanga kan seng luh mai loh chuan an tu leh fate pawh an bo zêl dâwn tihna a ni. Kohhran tin hian heng mite hruai kîr tûr hian a thara tan kan lâk a ṭûl hle a ni.

Keini pawh hian Pathian thu zirtîrna ziding hmanga ngaihpawimawh tûr thliar thiam a, chumi lam hawia insiamṭhat zêl kan mamawh ang. Mihring dikna leh zalêna ngaipawimawh chungin kan ram leh mipui mamawh phuhru zâwnga rawngbâwlina kan inher rem hret hret pawh a ṭûlzia a lang mêk a nih hi.

Sawi ho tur:

1. Kan ram dinhmun en chungin kohhran kalphung kan târ lante bakah uar zâwka rawngbâwlina kan kalpui tûr nia kan hriatte sawi ni se.
2. Kohhran programme pâwn lama inkhâwm leh inpâwlhona a tam ta tual tual hi ṭha kan ti em? Kohhranin kan sâwtpuina emaw kan sâwtpui lohna emaw eng te nge?



ZIRLAI PALINA**BCM DIN A NIH DAN**

Bible chhiar tûr: Tirkkohte 14:21-23; Rom 10:14-17.

Thuhmahruai: Mizorama Kohhran lian pahnih, Presbyterian leh Baptist Kohhrante hian Kohhran din tan hun atân January 11, 1894 kan pawm ve ve a. Missionary hmasa ber, Rev. F.W. Savidge (Sap Upa) leh Rev. J.H. Lorrain (Pu Buanga) ten Sairâng an rawn luh ni a ni a, kristianna chu Mizoram leilunga a inbenbel tanna ni a nih vâng a ni. Hetih lai hian chhim leh hmârah Mizo zîngah kristian tumah kan la awm lo a ni.

Hmâr lama Kohhran inţanna: Missionary hmasaten Aizawl an thlen phat aţângin rawngbâwl an tan nghal a. School an din a, ziak leh chhiar an zirtir a, grammar leh dictionary an siam a, ringtuah an siam a, Bible an letling bawk a. Kum 1896-ah Sunday School an din a, October 20, 1895 aţângin kan ramah chawl lovin Pathian Biak Inkhâwm kan lo nei ta bawk a. September 16, 1895 khân Pu Buangan Mizo tawngin thu a sawi a, Mizo tawnga a thusawi hmasak ber a ni.

Rev. D.E. Jones (Zosâphluia) pawhin August 31, 1897 khan Aizawl a rawn thleng a. Missionary hmasate chuan Welsh Presbyterian Mission kutah an rawngbâwl na an hlan fel hnuin December 31, 1897 khân Mizoram an chhuahsan ta a. December 31, 1898 –ah Rev. Edwin Rowlands (Zosâpthara) pawh a rawn thleng ve leh a. Mizoram chhiarpui hmasa ber, kum 1901 khân kristian 45 chauh an la ni a. Kum 1911-ah chuan nasa taka pungin, kristian chu 2,461 lai an lo tling ta a ni.

Ram inrelbâwlina inthlak avâng a Zosâpte an hawn thlâk dâwn meuh chuan mahnia inrêlbâwl thei Kohhran nghet a lo ni ta a. Synod inkhawmpui 2014 chuan “Kan Kohhran din kum chu 1894 January 11 a ni e” tiin a rel a. Synod Ni pawimawhah telh chhunzawmin Synod Holiday-ah kum 2018 ațangin a hmang ta nghe nghe a ni.

Chhim lamah Chanchin ța a lût: Kum 1899 favângah Zosâphluian a vawikhatna atân chhim bial a fang a, Lunglei a kal thleng a. Pûkpuiah thu a sawi a, Pu Dârphawka mang mak tak avângin miten an lo ngaihven hle a. Mizo țaung a thiam vak loh avângin a thusawi an hre thei mang lo a. A hnu lawkah Khasi pa, lamlian lai hotu, Sohan Roy-a chuan Pathianniah Pûkpuiah thu a sawi leh ta a. Mite chuan, “*Sâp lo kal thusawi bawk kha em ni?*” an ti a. Sâp pa thusawi tho kha a nih thu a han hrilh chuan December 18, 1899-ah khân Pu Thankûnga leh midangte chu kristianah an inpe ta a.

Kum 1900 khân Zosâpthara chu ringtharte tlawh turin chhim bialah a rawn zin ve a, Kristian hmun danga awmte Pûkpuiah chah khâwmin hla a zirtir a, mi 40 zet an ni. Zosâpthara hian chhim lam mite thinlung inhawng a hmuhin a phurpui hle a, kum 1901-ah chhim bial khaw 40 vel tlawh kualin thla thum lai a rawn thang leh a. BMS Missionary, Rev. George Hughes chuan Lunglei a rawn tlawh tih a hria a, Rangamati thlengin a zuk kal a. A hawn pahin kum 1901 krismas leh kumthar chu Pûkpuiah a hmang nghe nghe a ni.

Dârphawka mang: Pu Dârphawka hi Khawthîr khuaa piang a ni a. Khawthira an awm lai te, Kâwmzâwl leh Valchênga an awm lai tein mang danglam tak hi a hmu thin a. Vailen vawikhatna leh vawihnihna inkârah heng mang hi a nei a ni. Mang hi tum li zet, kum 1882, 1885, 1890 leh 1891-ah te a nei a. A chhûngte leh thiante ko khawmin a mang chu a hrilh a, “*He eng hi ka dam*

laiin a lo thleng lo mai thei a, engpawhnise, a lo thlen chuan lo zui ang che u” tiin a chah a.

Rev. Dr. CL Hmingan Mizoram Baptist Kohhran Chanchin a ziaakah, “*Kum 1955 a research ka beih laiin Kristian hmasa la damte ka kawm zingah ‘Dârhawka mang ka hriat avângin kristianah ka inpe a ni’ ti te pawh an awm*” tih a târlang. Pu Dârhawka mang avangin a tu leh fate leh mi tam tak thinlung a inhawng a, chhim lama kristian ðhan chakna chhan lian tak a ni. Pu Darphawka mâkpa, Pu Thankûnga phei chu chhim lama Sâp Upa leh Pu Buanga rawn chhuah leh hmaa Kohhran khaipa ber niin a hnuah Pastor a ni ta nghe nghe a.

BMS luh hmaa Kohhran ðhanna: Zosâpte khân Mizo Kristian hmasate chu midang hnêna Isua chanchin sawi thei turin an buatsaih nghâl a. Missionary te angin zah an phur ve lo a, thatchhia leh vâk rawlai mai maiah an puh thin. An zin chhuah changin thlen in hnawn châng an ngah a, khaw ðhenkhatin an lo buan bawk thin. Chuti chung chuan khaw hrang hrangah an Pathian thu neih hmasak, Luka ziaak ringawt keng te khân Isua chanchin an sawi ðhîn a ni.

Kum 1900 favângah Tîrhkoh Khûma, Khâra leh Phaisama te chu chhim lam khaw fang turin an chhuak ta a. Hemi tum hian chhim chhak lama Chin State an han thleng a ni. Hemi rah te pawh hi a ni ang, kum 1901-ah chuan chhim lamah Kohhran 10 lai an lo tling ta a. Sâp Upa leh Pu Buanga chhim lama an rawn luh, kum 1903-ah chuan Kristian 125 an tling tawh a. Hetih lai hian hmâr lamah chuan kristian 36 chauh an la awm a ni.

Ringtuten harsatna an tâwk: Ringtu awm hmasate thlavâng hauhtu an awm mumal loh chhûng hian

kristianten zû an in duh loh vang leh Pathiannia hna an thawh ve duh loh avângin mite chuan an hmumawh ta a. Lunglei SDO hnenah an hek ta a, Pu Thankûnga chu lalna chhuhsak tumtuah an puh a. Lunglei SDO chuan Pu Thankûnga chu thiam loh chantirin ni 10 a tântîr a, sazaiin lei a laihtîr bawk a ni.

Kristiante chuan lal leh vântlâng lakah enhran an hlawh a. Ringlote nêna khaw khata awm ho chu a nuam lo ta tial tial a, sawrkârin a buaipui ta a. Kristiante awmkhâwmna turin Sethlun chu an ruahmansak ta ringawt a. Lo vah vek tawh hnuah hâl an phalsak ta lo a, Sethlunah insuanin bawk an khawh a, lo an vât chawp bawk a. Pathianin mal a sawm a, an lo erawh a tha hle a, buh pawh an ngah hle a ni.

Chhim lama BMS an lût: Baptist Missionary Society hnuaia Home Committee ruahmanna angin September 1901 khan Rev. George Hughes chuan tirhkoh pahnih, Chakma leh Bengali hruaiin Lunglei a tlawh a. BMS ten chhim lama rawngbâwl tur an rawn dah hmaa Kohhran enkawl tûrin Lungleiah a hnutchhiah a. Heng tirhkohte hian tawng lama harsatna an neih bâkah tlâng ram an ngeih lo a, an awm rei thei ta lo a ni.

Sâp Upa leh Pu Buanga te chu BMS tirhin Mizoram chhim lama thawk turin an rawn chhuak leh ta a. March 8, 1903 khân Tlabung an thleng a, kristianten Lunglei aţangin an zuk hmuak a. March 13, 1903 khân Lunglei an rawn thleng a, awmhmun khuarna atan Serkawn an thlang ta a. Kum 1914 khân chhim bial Kohhran Presbytery din a ni a, chhim bial Pastor hmasa ber atân Pastor Chuaautera chu nemngheh a ni. Missionary an awm ngheh chinah ringtute chu an thla a muang a, Kohhran pawh an lo pungin an thang lian ta zel a ni.

Baptist Kohhran din ni: Mizoram Baptist Kohhran din tur hian inhmukhâwmna leh rorêlna hran a awm lo. Missionary hmasate leh ringtu hmasate kha Baptist Kohhran mi an ni a. Pathian Biak inkhâwmna hmasa pawh Baptist Kohhran zirtirna leh rinna zûlzuia bul tan a ni a. Baptist Missionary Society-in Mizorama an rawn luh hmasak kha an missionary-te rawngbâwlinaah an pawm avâng leh rawngbawlina mei mit lova vawiin thlenga chhawm nun zêl a nih avângin 'Mizorama Baptist Kohhran din ni chu January 11, 1894 a ni e' tih a ni ta a. BCM Constitution-ah 'Mizorama Missionary hmasa ber Sâp Upa leh Pu Buanga (Rev. F.W. Savidge leh Rev. J.H. Lorrain) ten January 11, 1894-ah Mizoram an rawn thleng a. Kohhran din tura an rawngbâwlina leh hma lâkna zawng zawngte Baptist Missionary Society (BMS) chuan an Missionary leh an Mission hnathawha an pawm tâk avangin Mizoram Baptist Kohhran din ni atân January 11, 1894 hi puan a ni' tiin a inziak ta a ni.

Tlangkawmna: Mizoram hmâr lama missioary hmasa leh ringtu hmasa chu Baptist Kohhran rinna leh zirtirna pawmtute an ni a. Chhim biala missionary lut hmasa chu Presbyterian missionary niin ringtu hmasate kaihruaitu leh bul tantu an ni ve thung a. Chhim leh hmâr Kohhran unau hian Kohhran din ni atana January 11, 1894 kan pawm ve ve hi tihmâkmawh a ni.

Sawi ho tur:

1. Baptist Kohhran din ni January 11, 1894 tih hi dik niin kan hria em? Dik kan tihna leh dik lo kan tihna chhan eng te nge?
2. Kan Kohhran rin dân leh zirtirna ang lova seiliente kan bulah an awm a. Hêng mite hi Kohhrana kan seng luh theihna turin engtia hma lak tûr nge sawi ho ni se.



ZIRLAI PANGANA

BCM DANGLAM BIKNA

Bible chhiar tur: Matthaia 28.18- 20:

Tichuan, Isua chu an hnenah a lo kal a, anniho chu a bia a, “Lei leh vâna thuneihna zawng zawng ka hnênah pêk a ni tawh. Chutichuan, kal ula, hnam tina mi zirtîrahte siam ula, Pa leh fapa leh Thlarau Thianghlim hmingah chuan baptis ula, thu ka pêk zawng zawng che u pawm turin zirtîr rawh u. Tin, ngai teh u, kei kumkhuain, khawvêl tawp thlêng pawhin, in hnênah ka awm zêl ang,” a ti a.

Thuhmahruai: Baptist Church of Mizoram (BCM) hian a din tirh aţangin kalphung mumal tak a nei a. London aţanga Baptist Missionary Society (BMS) tirha Missionary hmasa ber pahnih-Sâp Upa (Rev FW.Savidge) leh Pu Buanga (Rev JH.Lorrain) te chuan kan hnam ze mil thei bera an hriat angin Mizoram Baptist Kohhran kalphung min siam sak a, khawvêl ram hrang hranga Baptist Kohhran te nêh pawh kan kalphung a inang diak diak lo a ni tih hi kan Kohhran memberte chuan kan hriatchian a tul takmeuh a ni. Kan ram chhûnghah hian kum tam tak chhûng kha chuan Missionary-te din Kohhran pathum a awm tiin sawi thin a ni a, chûngte chu- Presbyterian Church of India (Mizoram Synod), Baptist Church of Mizoram leh Independent Church of Maraland-te an ni. Kum engemawti hnuah, chhan hrang hrangte avângin a chung a Kohhran pathumte aţang leh Mizoram pawn aţangin kohhran pawl (denomination) engemaw zât an lo chhuak ta a. Chutiang a lo nih takah chuan, kan Kohhran (BCM) kalphung leh thurin la chhawm nung chung a kalphung siam danglam hret engemaw zât an

awm ta a ni. Engpawh nise, kan ram chhûngah hian Kohhran pâwl (denomination) eng emaw zâtte nêh inanna awm nual mah se, tûn tumah hian kan Kohhran (BCM) danglam bîkna langsar zualte kan zirho dâwn a ni.

1. **Pathian hnêna nau hlân kohhran a ni:** Nausên Baptisma chantir hi Bible zirtirna a nih loh avangin BCM chuan Pathian Thuin a zirtir angin nausênte chu Pathian hnenah a hlân zawk thin. Nau hlan hi chhandamna atân ni lo mah se, fanaute hi Lalpa min pêk rohlû te an nih avângin, Lalpa ta an ni tih hrerengin Pathian hnênah kan hlan thin. Pathian hnênah lawmthu sawi a, Isua Krista hriatna leh rinna kawnga an puitlin theihna tura nu leh pate mawhphurhna inhriattirna a ni. Taksa, rilru leh thlarau lama an puitlin theih nân Kohhran pawhin mawh a phur bawk. Nau-hlante hi BCM chuan member puitling lo (Associate member) ah a dah a ni.
2. **Mi mal piantharna zirtîr kohhran a ni:** BCM chuan Pathian siam mi hringte hi mi mal piantharna nei ngei tûrin a zirtîr a. Mi tupawhin Lal Isua Krista chu Lal leh Chhandamtu-ah a pawm chuan mi piangthar, Chatuan nunna nei a lo ni ta tiin a zirtîr a ni (Johana 3:16).
3. **Inkhaikhawmna chhâwng li nei Kohhran a ni:** BCM hian Kohhran inkhaikhawmna chhâwng li a nei a, chûngte chu-Tualchhûng Kohhran, Pastor Bial, Area Baptist Council leh Assembly. Hêng enkawl tur hian rorelna chhâwng li- Tualchhûng Kohhran Rorêlna, Pastor Bial Rorêlna, Area Baptist Council Rorêlna leh Assembly Rorêlnate an awm bawk.

4. **Pastor Bial neia inenkawl Kohhran a ni:** Khawvêl hmun hrang hranga Baptist Kohhran pâwl te zîngah Pastor Bial nei lo, Tualchhûng Kohhran pakhat in anmahni enkawltu atân Pastor nei an awm nual a. BCM erawh chu a din tirh aţangin a remchân dân ang zelin Pastor Bial hrang hrang neiin Bialtu Pastorin a enkawl/rêlbâwl a ni. Pastor Bial huamchhûnga Tualchhûng Kohhran awm zat leh member zat erawh chu a in ang lo thluah thung a ni.

5. **Mission rawngbâwlna ngai pawimawh kohhran a ni:** BCM hian Mission rawngbâwlna hi a ngai pawimawh êm êm a, a din chhan ah pawh 'Pathian ram he khawvêla a lo zau zêl a, a lo ngheh a, a lo lan fiah deuh deuh nâna rawngbâwl hi a ni' tih a ni (BCM Constitution Bung 2:p.4). Chumi avâng chuan, BCM thupui (Motto) atan 'Chanchin Ṭha Mi tin tan' tih hman a ni a, BCM Assembly Rorêlna-in BCM thupui hi Biak In tina târ ṭheuh tûrin a rêl tawh angin kan târ hlawm a ni. Kohhran neitu Lal Isua thupêk zawmin a rawn dintu Missionary-te zirtirna kan rochun avâng leh Pathian thlarauba harhna kan chhawm nun zêl avângin Mission rawngbâwlna hi ngawrh takin BCM chuan a kalpui zêl a. Kohhran din ṭantirh aţangin thlaraubo man hna thawkin hnam dang zîngah Chanchin Ṭha a hril a, kum1939 chuan Mizoram chhûnga hnam dang Tuikuk leh Takam zîngah Chanchin Ṭha hril hna ṭanin, India ram chhûng leh India ram pâwn thlengin mission hna hi a thawk mêk a ni.

6. **Non-Liturgical (Nawn litarzikal) Kohhran a ni:** BCM-ah chuan Pathian Biak Inkhâwmna hrang hrangah leh Lalpa zanriah kîlnaa hman turin Programme siam sa, thu chham tûr, thusawi tûr

ziak sa, mipuiin a ruala sawi leh, ʔawngtai dân tûr thu ziaкса kan hmang ve ngai lova. Hun chang tûr apiangin ʔa an tih ang leh Pathian râwn chung a inbuatsaih dân angin an hmang mai a, mipuiin zalên takin Pathian biak inkhâwm kan nei ʔhîn. Chutianga duansa hmang lo chu, Non-liturgical kohhran tih a ni.

7. Sacrament chi hnih a nei: BCM hian Sacrament chi hnih- Ringtu Baptisma leh Lalpa Zanriah a nei.

i. Ringtu Baptisma: BCM chuan Baptisma hi Isua Krista chhandamna, rinna avanga Thlarau Thianghlim zara khawngaihnaa kan chan puanchhuahna leh entîrna a nih avângin a ngai pawimawh êm êm a, Baptisma chu Isua Krista ringtu, mi piangtharte chan tûr a ni tih a zirtîr a ni. Chuvângin, BCM chuan Bible zirtîrna dik tak a ni tia pawmin ‘Ringtu Baptisma’ hi a hmang (practise) a ni. Ringtu Baptisma chan dân tûr chu BCM Constitution-ah Chiang taka ziaк a ni.

ii. Lalpa Zanriah: Lalpa Zanriah chu Krista taksa leh a thisen entîr nâna ringtute’n Chhang leh Uain an chan hi a ni a, Lal Isuan an tân a nun a pe tih hriatreng nân an tih tura ruat a ni. Lalpa Zanriah chungchâng chu BCM Consitution -ah Chiang taka ziaк a ni.

8. Inneih dân chi hnih a nei: BCM hian Inneih dân chi hnih- Dân Puitling leh Dân te a nei a, Inneih Certificate erawh chu a inang thung a ni. Hêng Inneih Dân chi hnihte hi chipchiar takin BCM Constitution -ah târ lan a ni.

9. Mimal leh sakhaw zalêna Kohhhran a ni: BCM chuan a lo dintirh atangin vawiin thlengin sakhuana thil a mimal zalêna hi a ngai pawimawh hle. Mihring chhia leh tha hriatna leh a sakhaw rin dân kalh zâwna Sawrkârin a tihluh chu tha a ti lova, zalên taka mahni sakhua kalpui hi a duh a ni. Mi tinin duhthlan theihna zalêna an nei a, chumi hmang chuan a tha leh dik ni a an hriatte an ti thei a, diklo ni a an hriatte pawh tilo turin zalêna an nei baw. Mi tinin mahni chanchin theuh Pathian hmaah kan la sawi dâwn a, chuvângin, Sawrkârin emaw, mi mal pawhin sakhaw thila intihluh chu a diklo niin a ngai. Hêng bakah hian sakhaw thila inthliar, intihduhdah, inrahbeh leh inhnuachhiah te hi tha a ti lo va, vawiin thlengin a la dodâl zêl a ni.

Tlangkawmna: Keini BCM memberte hian kan nih dân leh kal dân phung danglam bîkna kan neihte hi hrechiang tûrin zirchian a ngai a. Kan thinlungah hian kan Kohhhran danglam bîknate hi kan hriatchian chuan Pathian Thu (Bible) zirtîrna dik tak kalpuitu Kohhhran kan ni tih hi kan hrechiang ang a, kan Kohhhran(BCM) ah hian kan nghet ang a, kan Pathian duhzâwna nungin rinawm takin a rawngbâwl hna hi kan thawk thei dâwn a ni.

Sawi ho atan:

1. He thuzira BCM Danglam bîknate kan tar lan bakah hian thawh belh tur neite kan awm chuan thawh belh ni se.
2. BCM hnuaia kohhhran leh memberte hian kan danglam bîknate hi kan lantir Chiang tha in kan hria em? Eng vâng nge nia kan hriat?



ZIRLAI PARUKNA

KOHHRAN-A RINAWMNA LEH NGHEHNA (Loyalty)

Bible chhiar tur: *Hebrai 13: 7-9: “In hotu, Pathian thu lo hrilhtute che u chu hre reng ula, an awm dâna thil chhuak chu ngaihtuahin an rin dân zir rawh u. Isua Krista chu niminah nê, vawüinah nê, kumkhua pawhin a pângngaiin a awm fo vang. Zirtîrna tinrêng leh zirtîrna mak tak len bovin awm suh u...”*

Jakoba 1:7-8: “Chutiang mi, rilru bulbâl nei lo, a thil tih zawng zawnga nghet lo mi chuan Lalpa hnênah engmah hmuh inring suh se”

Thuhmahruai: Kohhrana nghehna leh rinawmna thupui kan zirho dâwn a. Heta kohhran tia kan han dah hian beirual thu zirtute hi Mizoram Baptist Kohhran member-te kan nih avângin kan kohhran (Mizoram Baptist Kohhran)-a rinawmna leh nghehna ti zâwng pawhin a ngaih theih ang.

Mizoramah hian kohhran pâwl tam tak mahni inrelbâwlina leh kalphung hran theuh neiin thurin inngahna leh inkaihhruaina dan zawm tur hran tê tê neiin Pathian rawng kan bâwl hlawm a. Thurin leh tih dân phung kan neih te chu mahni pawl insawhngheh nân leh inkaihruai nân kan ngaipawimawh tlâng theuh mai a. Kan tum leh beisei in ang tlâng ni si heti tak maia kohhran hrang kan awm darh takah chuan mahni zawn theuhah Pathian ram tâna thawk ni siin kan thurin leh tih dân phung hian min tihrang viau mai. Chuvâng chuan ringtute hi Pathian thua nghet taka dinga Lalpa tâna

râwngebawl mai tur ni chung si hian mahni kohhran theuh aṭanga chak zawka rawng kan bâwl theih nân mahni nihna leh dinhmun sawhngheh erawh kan tum tâng theuh mai a nih âwm hi maw!

Nun rinawm leh nghet: Mizote hi nun ze nghet nei, mahni dinnaa nghet taka ding ṭhin, rinawm tak kan ni tiin kan insawi ngam ang em le? Engemaw thil thar leh danglam deuh a awma thle dual, a nuam leh a awlsam bawh dual, a huau huau leh hlimhlawp lâwm, mahse tei rei peih lo tak kan ni ti ta ila, chutiang êm atân chuan kan inphal lo mai thei. A tângpuiin tunlai Zofate nunzia han thlîr hian ze nghet cherh chawrh hi chu kan nei lo emaw ni aw tih theih a ni. Zai thiam thar an lo chhuaka kan bawh ruih ruih a, thuhrlitu lâ, tihdamna keng an lo chhuak a, chuti baw, chutiang zêlin thil thar dang engemaw deuh lo lang se chin taw, kan nei mang lo tih tur a ni. Chuti taka buaipui leh bawh huam huam e ti lo chuan kan daih rei lêm hlei lova, kan zuih ral leh thuai ṭhin zawng a nih hi.

Ringtu nun nghet, lehlam lehlama thle tawn sek lo, din ngaia ding nghet tlat, mi rinawm ni tûrin kan Lalpan min duh a. Kan zui Lal Isua hi danglam ve ngai lo, nimirah nân, vawirinah nân, kumkhua pawha pângngai reng a ni a. Chuvang chuan a zuitute pawh hi Amah anga nun nghet nei tûrin min duh a. Engkimah rinawm tûrin min duh a, thih thlenga rinawm taka a hniakhnung zui tûrin min sâwm a ni.

Kan kohhran leh kohhran pawl dangte: Mizoramah hian a tira kohhran awm hmasa, kan rama missionary lo chhuak ten bul an lo ṭan chu Mizoram Baptist Kohhran, Mizoram Presbyterian Kohhran leh Independent Church of Maraland tûna Evangelical Church of Maraland (ECM) lo ni ta te hi a ni a.

Mizoram Baptist Kohhran chu Missionary hmasa ber Sap Upa leh Pu Buanga-te hmangin Pathianin a din kohhran kan ni a. Pathian thu tak behchhana hmangin anmahni rawn tirtute Baptist kohhran kal phung ni si hmun danga Baptist-te ang lo deuh siin kan zawm thiam tur ang bera ðhain bul min lo ðansak a. Kal phung fel leh inkaihhruaina ðha tak neiin kum za chuang zet kan lo kal ve ta a ni.

Hun a lo kal zêl a, tih dân phung danglam deuh leh ngaih dan thar lo chhuakin, ðan chhan leh chhuanlam siamin kohhran pawl hrang hrang Mizoramah a lo pian belh zêl a, pawl/kohhran tam tak a lo awm ta. Lal Isua ringtu kohhran inti ðheuh siin thurin leh tih dân in anglo avânga rawngbâwl ho hlei thei lo kan lo ni ta nuk mai.

Kan kohhranah hian kan rinawmin kan nghet em?

Hetianga kohhran pâwl hrang hrang kan awm takah chuan kan kohhran mite pawh kan tih dan ang chiah lo leh in ang ve deuh tho si karah rilru nghet vak lova awm te pawh awm ve theih tak a ni a. “Inang khat vek kan ni a, thuhmun vek alâwm kan nih” ti a, remchang hmanga kohhrana insâwm te, tawktarh ðha tak neia an kohhrana tel tura thlêmna te pawh kan tâwk nawk âwm e. Chûng hunah chiah chuan ðan zawh loh mai pawh thil awl tak a ni.

A tângpui thuin, Mizoram Baptist Kohhrante hi kohhran la na lo leh ðan khawh lo pâwl tak, hnialkhân pawh ngah lo pâwl tak kan ni awm e. Chuvâng chuan, Mizoram hmun hrang hranga kohhran kan indinthuah tak hnu pawh hian kan Baptist mi leh sa, mahni kohhrana kîr leh ta lo an tam hle a ni. A chung a kan sawi tâk ang khân kan danglam lohna chhuanlam te, rawngbâwlna ðheuh ðheuh tia mahni nuam tihna leh duhna hmuna awm a thianga a lawm tih vângte leh a

chhan hrang hrang avângin kan kohhran chhuahsan ta te pawh kan nei fo ðhin.

Kohhran la na lo tak leh ðan bur lêm lo kan tam tâk deuh vâng nge ni dâwn, hmun ðhenkhat, Mizoram Baptist Kohhran a din ve thona hmunah ngei pawh mi ðhenkhat chu mahni kohhran, pi leh pu, nu leh pate chhana an lo awm ve tawh rengna ðhin aiin kohhran pâwl dang leh kohhran pawh ni chiah lova tel duh tlat zâwk tepawh an awm ta nawk mai a nih hi.

Amaherawh chu, a tlângpui thuin tute emaw nghet lo deuh te pawh awm mah se, Mizoram Baptist Kohhran member-te hi mahni kohhrana nghet leh rinawm tak tak kan la ni tih erawh i hria ang u.

Mizoram Baptist Kohhran ðat bîkna: Mizoram Baptist Kohhrante hian kohhran dangte aia kan inchhuan ve na pakhat chu, “Keini chu missionary rilru pu, thlarau bo vei kohhran kan ni” tih hi a ni ðhin. Kan thupuih pawh ‘Chanchin ðha mi tin tân’ ti ngat kha kan ni a. Chuvâng chuan he kohhran hi khawvêla ka rawngbâwlina tur Lalpan min pêk a ni tia ðhahnemngai zêl turin kan in sâwm a ni. Kohhrana kan ngheh leh kan rinawm zêl theihna chhan nia lang thil ðhenkhat han târ lang ta ila:-

1. Kan kohhran hi Pathian thu zirtîrna mila Missionary te hmanga Pathianin min din a ni a, kan thurin leh inngahna pawh Pathian thu a ni, chumi mila kan missionary-ten an lo siam hi Mizoram Baptist Kohhran member zawng zawng tân chuan kan kohhrana kan rinawmna leh nghehna atân a rin tlak êm êm a ni. Pathian ropuina tur leh a ram zau zêlna tur a ni.

2. Mizoram Baptist Kohhran inrelbâwl na hi Pathian Thlarau Thianghlim leh keini (Tualchhung kohhran aṭanga Assembly leh Fellowship Department etc) rorêlnaa innghat a ni a. Kohhran rorêlnaah a tam ber duh dan (Democratic principle) hmangin fimkhur takin thutlûkna kan siam ṭhin a, dik lo deuh leh fel hlel deuhva kan hriat chuan kan siam ṭha leh thei a, hei pawh hi kan danglamna leh ṭhatna tak a ni.
3. Mizoram Baptist Kohhran member-te hian kan aiawha rorêltute, kan hruaitute thu kan awihna hi kan rinawmna a lan chhuahna pakhat a ni. Kohhran hruaitu kal khâwmin kohhran rorelna pawimawh takah kohhran hruaitute kan thlang a, kan thlan chhuah apiangte chu hruaitu atân kan pawm thei zel hi kan kohhran ṭhatna, nghehna leh kan rinawmna a ni.
4. Sâwma pakhat leh thilpêk, sum leh pai Pathian ram tâna kohhrana thilphal taka kan pêk hian kohhran chu Krista taksa, Krista aiawha palai hna thawktu, Krista thiltih chhunzawmtu a ni tih kan pawmzia a lantîr a. Krista laka kan rinawmna chuan kohhran lakah min rinawmtir a ni. Kum tina Assembly target kan la khum thei zêl te hian Pathian leh a kohhrana kan rinawmzia leh kan kohhran rawngbâwl naah hian kan ngheet a ni tih a tichiang a ni.
5. Mizoram Baptist Kohhrante hi kan inrêlbâwl naa hmunpuia inchhûng khâwm (Centralised church) kan nihna hi kan chakna hnâr pawimawh tak a ni a. Kohhran rorêlna te, Headquarters thu chhuak leh beiseina Tualchhûng kohhran ten kan dah pawimawh ṭhin hian kan rinawmna a tilang a.

6. Chanchin Tha hrilna lam (Mission) kan dah pawimawhna leh thlarau bo man kan duhna hian kan kohhran lakah rinawm lo thei lovin min siam te hi a tha em em a. Mi zawng zawng tana Chanchin Tha thlentu nih kan duhna hian kan kohhran member-te hi min phuar khawm tha hle a ni.

Tlangkawmna: Kan kohhran member-te Pathian leh a kohhran laka kan rinawmna leh ngheh tlat avang hian dotu tam tak kârah nasa takin hma kan sâwn a ni. Hla siamtuin “Hetah lo thiat mah se, hmun dangah a din thar” a tih ang deuhvin Mizoram, India ram leh khawvel hmun dang thlengin rawngbâwna kan neih belh ve zêl a, Lalpa malsawm tlaka rawng kan bâwl zêl phawt chuan tun aia nasa zâwkin min la chawi sâng ngei ang.

Sawiho tur:

1. Mizoram Baptist Kohhrante hi kan kohhranah hian kan rinawmin kan nghet tawk viau kan ti nge, kan tha tâwk lo kan ti? Ni-a kan hriat dan hrang hrang sawi ho ni se.
2. Awmna hmun insawn avanga mahni kohhran aia kohhran danga lawi ta sawi tur kan hria em? Eng nge a chhan ni a kan hriat sawi ho ni se.



ZIRLAI PASARIHNA

BCM THURIN HRIAT CHIAN

Bible chhiar tur: Genesis 1:26, Rom 6:4

Thuhmahruai: Hun eng emaw chen chu BCM hian thurin mumal taka daha sawi fiahna kan nei lo. Chuvângin 1985 Assembly Executive rôrelna chuan Thurin chhiar theih turin a buatsaih a, 1987 Executive Committee chuan chu chu thlîrin a zir chian hnuah, 1988 Assembly Zotlâng, Lungleia neihah Thurin Article 21 awmna chu a lo pawm ta a ni. Kan thurin puan chhuahte kha a seiin a chipchiar a, chuvângin kan thurin fun kim tho siin thurin puanchhua 21 (Articles) te chu 12-ah dah a lo ni ta a ni. Kan thurinte hi a mal mala zir fe tham vek an nih avângin kan hriat chian òul zual bîk nia langte zaninah hian kan zir ho dâwn a ni.

1. Trinity Pawmtute kan ni: Kan thurin Article No.2 naah chuan *“Pathian nung leh dik tak Pakhat chauh a awm a, Pathian pakhatah chuan mi nung pathum - Pa, Fapa, Thlarau Thianghlim a awm kan ring”* tiin kan dah a. Pathian pakhata mi nung pathum awm (Trinity) hi Bible zirtirna dik tak a ni. Trinity chungchâng hi mihring ngaihtuahna hmanga duan chhuah a ni lo va, Pathianin a mite hmanga a inpuanchhuahna, dik lo thei lo niin Pathian Thu laimu a ni. Hemi chungchâng hi tawi tê tēin lo zir ila.

i. Pathiana mi nung pathum awm: Trinity chungchâng hi ti hian hriat awlsam zâwngin a sawi theih- Pathum, Pakhat a awm, (Three in One) Pakhat- Pathum a awm (One in three) Pathian hrang hrang pathum a hranga awm

vek ni lovin mi nung pathumte chu then hran theih miah lohva inzawmin an awm a, thil engkimah an thawk ho a ni. Bible ah hian Pathian Pakhata mi nung Pathum a awm thu hmun tam takah kan hmu. Thuthlung Hlui lama a lan dân tlêm lo en ila:-

a) *Khawvêl siamnaah:* Gensis 1:1&2-ah chuan “a tirin Pathianin lei leh vân a siam a. Pathian Thlarau chuan lei chungte chu a awp reng a” tih kan hmu. (Gensis 1:1&2) Pathian leh a Thlarau chu pumkhat, nimahsela, a hrang siin an awm.

aw) *Mihring siamnaah:* Mihring siamnaah hian “kan anpuin keimahni ang tak hian mihring siam ila” (Genesis 1:26) tih kan hmu. Tichuan, Pathianin mihring a siam chu thil pathum -rilru, taksa leh thlarau neia siam a lo ni ta a ni. Hêng-**rilru, taksa** leh **thlarau** te hi a hrang ni si, pumkhatin mihring pakhatah chuan an awm a ni. Hetiang hian Pathian pakhatah chuan Pa, Fapa, Thlarau Thianghlim Pumkhat chu inthuruala thawk hovin an awm a ni. (1Thessalonika 5:23)

b) *Pathian hming sawinaah:* Thuthlung Hluia Pathian hming sawinaah hian Hebrai thumal Elohim hi wawî 2700 vêt hman a ni. Elohim chu pakhat aia tam, pumkhat sawina a ni. Tin “Pathian chu pakhat a ni” tih sawi nan Hebrai tawng echat (ekhat) hman a ni a, chu chu inpumkhat (union, unit) tih sawina a ni. (Deut. 6:4) Hebrai tawnga pakhat chauh sawi nân yachid (iakhit) a ni thung a, chu chu pakhat hlang tihna a ni. Pathian pakhat a nihna hi

nupa pumkhat an nihna nêñ inang renga hman a ni bawk. Heti hian kan hmu a, “Mipain a nupui a vuan ang a...tisa pumkhat an lo ni tawh ang.”(Genesis 2:24) Heta pumkhat sawi nan hian Deuteronomy 6:4 -a Pathian pakhat sawina echat (ekhat) tho hman a ni.

ch) Thuthlung Thar lamah: Thuthlung tharah hian Pathian leh a fapa Isua chu leilung pian hmaa awm dñn an nihna chñang takin Johana hian min hrilh a. “A tñrin thu a awm, thu chu Pathian a ni” tiin. Heta “thu” hi Greek tawngin logos a ni. Sñp tawng Bible hrñng hrñngah “thu” -word” tiin an dah mai a, Johana sawi tum tak hi chu Siamtu, Engkimtithei, Thil bul tihna a ni zñwk. A awmze dik takah chuan a tñrin Isua a awm a, Isua chu Pathian hnñnah a awm tihna a ni. Pa leh Fapa chu awm tlñng, engkima inlungrual, pumkhat an nihna tarlanna a ni. Tin, Thlarau Thianghlim chu he khawvñla min chenchilhtu, Pathian a tanga chuak Lal Isua hnñna min hruaitu, Pathian, kan biak leh kan zui tur a chu a ni bawk. (Luka 3:16; 11:13; Johana 3:5-8; 7:39; 14:17; 15:26) Pa Fapa leh Thlarau Thianghlim te hian sona pakhatana bñn pathumte chuan awmze neia hna an thawk theuh ang hian inlungrualin hna an thawk tlñng a, he inpumkhatna hi ringtute inpumkhatna leh inngahna pawimawh tak a ni bawk a ni.

2. **Chhandamna:** Kan thurin (Article No.4) ah chuan ti hian kan dah a, “*Pathian khawngaihna chuan Isua Kristaah mi zawng zawng tñn Chhandamna a thlawnin a siamsak a, an sualte sima Lal Isua Krista ringa Lal leh Chhandamtua pawm apiangte chuan chhandamna an chang ang.*” tiin.

Chhandamna chungchânga kan rin dan hi Kohhran dangte nen a danglam a. Kohhran thenkhat chuan mi mal chhandamna hi an pawm lo va, Kohhran pumpui chhandamna an ring. A dangte chuan chhandamna tura simna pawimawhna hlamchhiahin baptisma chan leh sabbath serhte hi chhandamnaah an ngai bawk. Chhandamna chungchânga kan thurin kan hriatchian turte a hnuaia mi ang hian lo zir chhunzawm ila:-

- i. **Sual simna:** Sual simna chu Pathian laka mihringin thil sual a tih inchiirna leh tih duh tawh lohna, chumi avânga Isua panna a ni. Hei hi chhandamna chang tura kawng awmchhun a ni. Mi dang sualna simsak theih a nih loh avângin chhandamna chu mi mal simna avânga chan tur a ni. (Mathaia 4:17; Luka 19:8)
- ii. **Khawngaihna avânga chhandamna:** Rinna avânga khawngaihnaa chhandam kan nihna hi kan kohhran chuan nghet takin kan pawm a, thinlung tak taka sual hawisan duhna nei a, Lal Isua chu chhandamtu a nih ring a, pantute hian Krista khawngaihna an tâna dahsa chu an chang thin. Chhandamna chu thiltih, baptisma chan, sabbath serh, eng kohhran/pâwl bik emaw zawm avânga chan theih a ni lo. (Rom 3:6; Heb 11:6; Ephesi 2:8)
- iii. **Chhandamna chan theih dan:** Mi thenkhat chuan Pathian thuneihna (Sovereignty of God) an kal pui nasat lutuk avângin “chhandamna chang turin mihringin tih theih kan nei lo, Pathianin a duh chu a ruat lâwk sa vek a ni,” tiin mihring duh thlan theihna (Free will) an paih a. (Hei hi zirtirna him lo a ni)Pathianin a then

hremhmun tla tur leh vânrâm kai tur bîkin min siam lo va, mi zawnzawng hi chhandama awmah leh thutak hriaah min duh. (1 Tim 2:4,6) Mimalin a duhthlannain Pathian a thlangin a thlang lo mai zâwk a ni. Pathian remruatnanaah chuan mi zawnzawng hi a tlannaa lût turin a ruat lâwk a, (Rom 8:29-33) nimahsela he ruat lâwkna tak hi mimalin a duhthlanna hmanga hnawl theih a nih avângin chhandam ni turin sual sima duhthlanna fim taka Lal Isua Lal leh chhandamtua a pawm a, pianthar a ngai a ni (Johana 3:3)

- 3. Baptisma chungchang:** Kan thurin Article 10-naah chuan Baptisma chungchâng ti hian kan puang chhuak (confess) a ni. *“Baptisma chu Lal Isua ringtuin Isua thihna leh thawhlehna a tawmpui a ni tih entîr nâna Pa leh Fapa leh Thlarau Thiamngghlim hminga tuia hnimpila chan hi a ni,”* tiin.

Kan kohhranin Baptisma kan kalpui dân leh baptisma chungchâng kan rindan hi bible thu nen a inmil a, Apostolte zirtîr dân leh an tih dân nen pawh a inmil a ni. Hetiang hian lo zir chhunzawm ila.

- i. Hnim pil ngeia chan tur a ni:** Baptisma chu, Greek tawng, **baptizo** tih aţanga lak a ni. Chiah pil, hnim phûm, tihna a ni. Hei hian Lal Isua thihnaah phûma awmin a ruala kaih thawh ka ni tih entîrna leh puanchhuahna a ni. (Kolossa 2:12) Krista Isuaah chuan ka mihring hlui chu tih rala awmin mihring thar Krista chuan ka inthuum tawh tih entîrna a ni baw. Tuiah Baptist in kan awm lova Kristaah baptis in kan awm zâwk a ni. (Galatia 3:27)

ii. Baptisma chu Lal Isua ringtute chan tur, ringtu Baptisma a ni: Kan kohhran chuan Baptisma hi Lal Isua ringtute chauh chan tûrah kan ngai. Baptisma chan hmam mi malin Isua chu a duhthlanna fim takin a thlang hmasa a, Isua zuitu a lo ni ta a, Kristaah chuan ka thi a, phûmin ka awm a, ama ruala kaih thawh ka ni ta, tih lantîrna leh puanchhuahna (confession) a ni. Tirhkohte Thiltih bua Baptisma an chan dân pawh hetiang vek hi a ni. (Tirh 2:41, 8:35f., 9:17ff 18:8)

Tlangkawmna: Kan zirlaiah hian kan thurin sâwm leh pahnihte(12) fun kim vek thei lo mah ila, a pawimawh zual Pathiana mi nung pathum awm (trinity chungchânga kan kohhranin kan pawm dân te, chhandamna leh Baptisma kan pawm dân chungchângah te hian Zorama kohhran thenkhatte nêh kan hrang hlauh a ni. Heng kan thurinte hi kan sawi tawh ang khân mihring in a duan chhuah ni lovin Pathian thu danglam thei lovin min zirtir dân dik tak kan vawn tlat tur a ni tih kan hriat a pawimawh hle.

Sawi ho tur:

1. Thurin dik lovin chhûngkua, kohhran leh khawtlanga nghawng tha lo a neih theihte sawi ho teh ang.
2. Baptist Kohhran member tinte hi kan thurin-a kan insawhngheh deuh deuh theih nân engtia hma lâk ngê thaah kan hriat i sawi ho bawh ang u.



ZIRLAI PARIATNA

MIZORAM BAPTIST KOHHRANTE INPUMKHATNA

Bible chhiar tur: Johana 17:11, Ephesi 2:15

Thuhmahruai: Inpumkhatna hi ringtu dik tak leh Pathian mi kalkhâwmte chhinchhiahna ropui tak a ni. Kohhranah hian mi chi hrang hrang, duh dân leh ngaih dân inang lo tak tak kan awm khâwm thin; nimahsela, Pathian Thlarau Thianghlim avângin hnam, chî leh vun rawng inang lo tak takte rem taka chuktuaha awmin, Pathian ram tân kan thawk hova, Biak In thianghlimah kan lo chang thin a ni (Ephesi 2:21). He ringtute inpumkhatna hi kohhran ti nuamtu, ringtu mi mal hrang hrangte min hahchawlhtîrtu leh min thlamuantu a nih avângin Pathian Thua inpumkhatna kan hmuh dân te, inpumkhat a tul nachhan leh inpumkhatna tichhe thei thilte zaninah hian kan zir ho leh dân a ni.

1. Pathian Thu; Inpumkhat tura inngahna:

Kohhran hote inpumkhatna hi Pathian Thuah a inngat a. A hnuaia mi ang hian kawng thumin zir ho leh ila.

- i. Pa (Pathian) leh Fapa (Isua Krista) inpumkhatna kan entawn tur):** Pathian thuah hian Pa (Pathian) chuan Fapa (Isua Krista) chu a hmangaih a, Fapa (Isua) pawhin Pa chu a hmangaih a, engkimah inthuralin hna an thawk a ni tih kan hmu. (Johana 6:57, 14:11,14:31) An inkâra hmangaihna ang hi kohhran hote inkârah pawh Thlarau Thianghlim tanpuinain a lo awm thin. Pa leh Fapa inpumkhatnaah chuan, engkim intawm

tawwna leh inhriat tlân tawwna boruak a awm a, chu chu keini kohhran hote inpumkhatna innghahna leh a laimu chu a ni. Thlarauva Pa leh Fapa an inpumkhat ang hian keini Baptist kohhran member hmun hrang hranga awmte hi kan inpumkhat thei a ni.

ii. Inpumkhat hi Lal Isua duhthusâm pakhat a

ni: Thlarauvah chuan Pa leh Fapa chu pumkhat an ni. He pumkhatna ang hian amah ringtute pumkhat kan nih theih nân “Nangin mi pêkte ho hi i hmingin hum rawh, pumkhat an nih theih nân, keimahni ang bawh hian” tiin Lal Isua chu ðahnemngâi taka a tawngtâi thu kan hmu (Johana 17:21-23). Pa leh Fapa chu Thlarauvah pumkhat an ni angin Kohhranhote pawh inpumkhat turin kan Lal Isua chu ðahnem ngai takin a tawngtâi a ni. Pathianin Isua chu a ropuina a pe a, chu ropuina chu Lal Isua’n amah ringtute min pe chhâwng a, chu ropuina chu inpumkhatna hi a ni. He Puithiam Lal tawngtainaah hian Kohhran ropuina chu hausakna leh mita hmuh theiha ropuinaah innghat lovin thlarauva inpumkhatnaah a innghat zâwk a ni tih kan hmu thei bawh.

iii. Krista thisenah chhûngkaw pakhat kan ni:

Mihring hian inzawmna (relationship) chi hrang hrang kan nei. Mi thenkhat chu Political Party pakhatna an awm avângin politics zara inzawmna an nei a, tin, NGO (pâwl) hrang hrang leh inchnghungkhat naachte inzawmna kan nei. Hêng inzawmna zawng zawng chung a awm chu Kristian tinte Krista thisena kan inzawmna hi a ni. Kraws thisena hmun khata hrin kan nih avângin he inzawmna leh

inpumkhatna hi a nghetin a thûk êm êm a, tisa inzawmna hrang hrang aia thûkin a awm thei thin, chuvangin mi piangthar awmkhâwmte chu Thlarau Thianghlim zârah chhûngkhat, vân khua leh tui kan ni a, inpumkhat lo thei lovin kan lo awm zâwk thin. (Ephesi 2:19, 4:4)

2. Inpumkhat a tûlna chhante: Inpumkhat a tûlna chhan hrang hrang a awm thei ang. A hnuaia mi ang hian kawng thumin lo zir ho ila:

i. Pathian ram tizau turin: Tualchhûng kohhran hrang hrang kan awm a, hêng kohhran hrang hrangte hi kan chak dan a inang lo hle ang. Nimahsela, inpumkhata kan luan za loh chuan Pathian ram tâna thil lian tham kan ti thei dawn lo, kan damdawi in, sikulte leh kan mission field hrang hrangte hi kohhran malin a thawh sên chi a nih loh avângin tihdam hna leh thiamna pek chhuahna leh Chanchin tha hrilh darh zelnâ kawngahte hian hma lian taka kan lâk zel theih nân kan inpumkhat tlat a pawimawh a ni.

ii. Kan ram chhûnga sualna chi hrang hrangte do tûrin: Tûn huna kan ram dinhmun kan thlîr chuan hnathawh tûr kan ngahzia kan hre tlâng theuh âwm e. Khawtlânga sualna lo pung zêl hmachhawn tûrte, sawrkar kal phung dik lo khalh ngil tur leh Pathian thilsiam dangte enkawla vêng him tur hian tualchhûng kohhran mala kan tih theih a tlêm hle ang, amaherawhchu, tualchhung kohhran hrang hrangte'n inpumkhata kan hmachhawn a, kan beih tlana, kan tan ho phawt chuan nasa takin ram leh khawtlângin a that phah ngei ang.

iii. Keimahni inṭanpui tawn turin: Zoram chhhûng leh pâwna Mizoram Baptist Kohhran, tualchhûng kohhran hrang hrangte hi kan inang lo hlawm hle, thenkhat ngêlghet leh intodelh tak tak kan awm laiin a ṭhente chu fahrah tê tê kan ni hlawm. A lian leh thiltithei kohhran te'n a tê zâwk leh dinhmun harsa zâwkte dawm kana, ṭanpui hi Pathian ram zia a ni a, kan rinna nêh pawh a inmil a ni. Chutih lai chuan mi ṭhenkhat chu mahni tualchhung kohhran bâk thlîr thiam lo leh kohhran dang (pawl dang ni lo), BCM kohhran ngei tai ru tlat a awm theih. Hei hi inpumkhatna tichhe thei, Setana hnathawh chiang tak a ni tih kan hriata kan do tlat a pawimawh hle. (Galatia 5:26)

3. Kan inpumkhatna turte: Inpumkhat loh hi kan sawi tawh angin Setana hnathawh a ni, a hmanraw hriam tak, a hman thiam êm êm a ni bawk. Kohhranhote hi inpumkhatin lungrual takin kan thawk ang a, a ram kan tihêk ang tih hi a hlau em em a ni. (2 Peter 2:1, Galatia 5: 20) Hei hi hre rengin a hnuaia point kan târ lanahthe hian inpumkhat kan tum tlat a pawimawh hle.

i. Mission-a inpumkhatna: Baptist kohhran chuan tum thuhmun kan nei a, chu chu hre lote hnêna Chanchin Tha hril darh zêl hi a ni. Hei hi kan thupui leh kohhran dangte aia kan danglam bikna pawh a ni. Baptist kohhran member tinte hi missionary kan ni tih kan pawm a ngai a, kan thawhna hmun erawh a hrang mai a ni. Chuvângin, mission hna kan thawhnaah hian inpumkhatna tha tak nen Pathian tân kan thawh ho a ngai . Tualchhûng kohhranin kan sum leh pai member te'n phal

taka an pêkte a theh luhna hmun tura ui lova kan theh luh zêl leh member tinte'n mission rawngbâwlina an ngaihpawimawh theihna tûra hma lâk hi kan tih tûr pawimawh tak leh kan inpumkhat tlatna tûr a ni.

ii. Thurin leh Pathian thua inpumkhatna:

Kohhran member tinte hi kan thu rinah kan inpumkhat a ngai a, zirlai hmasa a kan zir tawh ang khân kan thurinte hi mihring duan chhuah an ni lo va, Bible zirtîrna dik tak a ni tih kan pawm tlân a ngai a ni. Kohhran pakhata awm si, rin dan hrang hrang kan neih chuan a inpumkhat tak tak theih dâwn loh avângin kan thurin puanchhuahte hi lungâwi takin pawm ila, chu chuan kan zîngah Pathian Thu leh kan rinnaa inpumkhatna tha tak a thlen ngei ang.

iii. Kohhran tih dân(tradition) zawm kawnga inpumkhatna:

Kohhran tha taka a kal theih nân Inkaihhruaina(Constitution) kan nei a; nimahsela, kan inkaihhruainaah kan kohhranin kan tih thin (kan tradition) ziah lan vek sên a ni lo. (Entir nan, Lalpa zanriah sacrament kan eiin a semtu leh buatsaihtu (minister)-ten mipui in an chan zawh hnuah an chang thin). Kohhran rorêlna leh Pathian biak inkhâwm kaihhruai dân leh kan thutna kan rem thin dan thlengin tih dan bîk (tradition) nei kan ni a, heng kan hotu kaltate leh kan missionary-te'n min lo kaihhruai dante hi lungâwi taka kan zawm tlân a pawimawh, kan tih dan thin (tradition) te hi lungawi taka zawm kawngah kan inlungual a pawimawh a ni.

4. BCM Inpumkhatna tichhe theite: Khawvêl ðhang chak leh inthlâk danglam nasa tak hian thawhona leh inpumkhatna tichhe thei thil tam tak a keng tel a, chûngte chu lo thlîr ho ila.

i. Rorêlna fel tâwk lo: Rorêlna dik tâwk lo kohhrana a awm hian kohhran member-te zingah rilru natna leh kohhran duh khawp lohna a thlen ðhin, chu chuan kohhranah khi siamin inpumkhatna a tichhe ðhin. Chuvângin, rorêlna pêng hrang hrang, a tê ber a ðanga alian ber thlengin mihring duh dân aiin Pathian duh dân a ni ang em tih hi kan ngaihtuahna hruaitu a ni fo tûr a ni. Pathian duhdân a rorêlnaah inpumkhatna a awm ðhin. Chuvangin rôrelna fawng vuantu hrang hrangte'n fimkhur leh Pathian ðih dêka ro an rêl a ngai a ni.

ii. Thlir zimna: Inawp khâwmna fel zâwk leh thawhhona a that zêl theih nân Tualchhûng kohhran, bial leh Area-ah te kan inñhen hrang lo thei lo va, a ðûlna avânga hetiang a hrang anga langa kan awmna hi kan inpumkhat deuh deuh theih nâna keimahni ngeiin kan rêl a ni tih kan hriat a pawimawh a, kan hman thiam pawh a ðûl a ni. Kan area emaw, kan bial emaw tân chauha ðha tur kan thlîr a rem lo va, Mizoram Baptist Kohhran pumpui tan a ðha ang em tih hi kan thlîr dân leh thutlûkna min siamtîrtu a nih fo a pawimawh a ni.

iii. Thu awihlohna: Lian tâwk leh mi dang mahmawh lova inhriatna te, hotute leh rorêlnain a pass tawh kan rilrem zâwng a nih loh avânga dodâl tlatnate hian kohhranah inpumkhatna a tichhiain thawhona pawhin

nasa takin a tuar thei a ni. Thu inâwih tlân a, Pathianin kan hotute leh rolrêlna kal tlanga tih tur leh mawhphurhna min pêk hrang hrangte lâwm taka kan thawh hian Pathian ramin a ðat phah ðîn. Thu inawih tawn lohna erawh chuan kohhran a tidarh fo ðîn.

Tlângkawmna: Kohhran inpumkhatna hi Pathian aţanga chhuak a ni a, Pa leh Fapa leh Thlarau Thianghlim, Pathiana mi nung Pathum awmte inlungual leh inhmangaih tlâng taka an awm anga inpumkhat tlata kan awm hi Lal Isua duhthusâm leh a ðawngţaina a ni. Inpumkhatna ða chuan kohhranah zalênna leh thawhhona ða a siam ðîn. Mizoram Baptist Kohhran hmun hrang hranga awmte hian hei hi hria ila, kan inpumkhatna dâltu sual hnathawh hrang hrang laka inthiarfihlimin Pathian duh zâwna inphumkhata awm zêl tûrin ðan i la sauh sauh ang u.

Sawi ho tur:

1. BCM hnuaia tualchhûng kohhran hrang hrangte hi tun aia inpumkhat leh inhmangaih tlâng zâwka kan awm theih nân engtia hma lâk nge ðaa kan hriat i sawi ho teh ang.
2. Tualchhûng kohhrana member-te inkara inpumkhatna tichhe thei leh Kohhran leh Kohhran (local church leh local church dang) inkara inpumkhatna tichhe thei thil hrang hrang te thawh ho teh ang.



ZIRLAI PAKUANA

BCM RAWNGBÂWLNAA ẲAN HO THIAM

Bible chhiar tûr: *Johana 17:11 Tin, kei zawng khawvêlah ka awm tawh lo vang, hênggho erawh hi chu khawvêlah an awm ang, kei i hnenah ka lo haw dâwn ta. Ka Pa thianghlim, nangin kei mi pêkteho hi i hmingin hum rawh, pumkhat an nih theih nân, keimahni ang bawh hian.*

Thuhmahruai: Pathianin Kohhran a din chhan chu amah chibai bûk tûr leh he khawvelah Pathian ram a lo zau va, a lo ngheha, a lan fiah deuh deuh theihna tûra rawngbâwlho tûrin a ni. Rawngbâwlna chu Lal Isua nun dân kawng zawha he khawvêla Pathian ram din tûra thawh hi a ni a, ‘ţanho’ chu thil tum thuhmun tihlawhtling tûra thawh ho hi a ni. Mizoram Baptist Kohhran hian Pathian ram tân hma lam a pan zêl theih nâna pawimawh chu rawngbawlnaa ẵan ho thiam a ni. ẵangho thei tûr leh thiam tûra kan mamawh leh tih dân tûr tam tak sawi tûr a awm thei ang. Kohhran chhûnga awmte hi huang hnih: Hruaitute leh member-ah ẵenin BCM rawngbâwlnaa ẵan ho kan thiam theih nâna kan mawhphurhnate a tlângpui chauhin kan zir ho dâwn a ni.

- 1. Hruaitute mawhphurhna:** Kohhran hruaitute chu kohhranten anmahni kaihruaitu leh enkawltu atâna an thlan, thuneihna an pêkte hi an ni a. BCM-ah chuan Headquarters aẵanga tualchhûng thlenga hruaitute (Pastor, Upa, Rbt, Fellowship hruaitu) a huam thei ang a, rawngbâwlnaah ẵan ho kan thiam theih nâna mawhphurhna sâng tak neitute an ni. Sipai General ẵha chuan indona

mualah a sipaite a ʔan hotir thiam a, hnehna a chanpui fo ʔhin. Hruaituten member-te min ʔan hotir thiam leh thiam lovah BCM hma lam hun hi a innghat thui hle a ni. BCM rawngbâwlnaa ʔan ho kan thiam theih nâna hruaitute mawhphurhna tawi tê tēin kan thlir dawn a ni.

1.1 Ringtu mi mal tina theihna awm sâwr chhuah:

Rawngbâwlhona chu ringtu mi mal tinte thil tum thuhmun tihlawhtling tûra Krista thuneihna hnuaia intêlkhâwm hi a ni a. C. Gene Wilkes-a chuan, “Rawngbâwl hona kan tih hi ngaihtuah zâwng leh duhzâwng inang thawh hona ni ringawt lovin mi mal tinte theihna leh chakna sâwr chhuak tûr leh mi dangte chak lohna inkhai chhuak tawn tûra thawh hona hi a ni,” tiin a sawi.

Hebrai ziaktuin, “Hmangaih leh thil ʔha tiha inchawk tho tûrin inngaihtuah tawn ang u,” (10:24) a tih angin rawngbâwlnaa ʔan ho thiam hi thinlung inhneh hmasakna aʔanga lo awm a ni. Dr Chalmers-a chuan, “Kohhran hi engtin nge a inrêlbâwl tih aiin kohhran hian eng mi nge a chher chhuah tih hi a pawimawh zâwk,” a ti a, a dikin a pawimawh hle a ni. Kohhran hi member zawng zawngin Pathian ram tân theihtawp an chhuahna hmun tur a ni. BCM rawngbâwlnaah kan ʔan ho thiam theih nan member tinte theihna sâwr chhuahna tûr remchâng siamsak thiam a pawimawh a, chu chu hruaitute mawhphurhna a ni.

1.2. Member-tea rinna nghah ngam:

Isua khân a hunlai khawvêla mi hnuaihnung tê tê a khawm a, anmahniah rinna a ngat ngam a, a rawngbâwlnaa ʔanpuitu ʔha takah a chhuah

hlawm a ni. Kohhran hi mihring siam thatna hmun, mi fel lote fela siamna, mi hman tlâklohte hman tlâka chher chhuahna hmun a ni tûr a ni. Member tu pawh kan rin ngama mawhpurhna kan pêk phawt chuan Pathian ram tâna tan hopui tha takah kan chhuah thei ang. Kohhran hi chhûngkua kan ni a, chhangchhe deuh anga a lan pawhin Pathian zârah inkhai fel hun hi a awm ve leh mai thin.

1.3. Chanvo sem zai thiam: Mosia hunlai khân mipuite chuan an thu leh hlâ rêlsak tûrin zîng ata tlai thlengin Mosia kha an chim buai thin a. Jethroa chuan Mosia hnênah thurâwn pein mipui zinga mi hmantlâk deuh deuhthe thlang chhuaka rorêlna kawngah chanvo sem tûrin a hrilh ta a. (Exodus 18:13-26) Jethroa thurâwn chu a tangkaipui ta hle a ni. Mi pakhatin chanvo a chelh teuh hian mi dang chher chhuahna kawnga daltu a ni thei a. Mawhpurhna hian thuneihna a ken tel avangin thuneihna hman kawngah dai sual palh a awm thei bawh a, chu chuan tan hona boruak a tichhe thei a ni. Chuvangin, indaih lohna hmun a nih lêm loh chuan a theih chen chenah chanvo sem zaia inzângkhai tawn hi tan hona siamtu tha tak a ni ang.

1.4. Member-te ngaihsak, an thu leh hla ngaihthlâk thiam: 'Inngaihsak' chu mi chungka khawngaihna lantîr, an chanchin a chhia a tha hriatpui, an mamawh hriat sak leh tanpui hi a ni. Inngaihsak leh tan ho thiam hi thil inzawm tlat a ni. Mi tin hi mi pawimawh, tangkaina nei, palzam mai mai loh tûr leh ngaihsak hlê tûr nia inngai vek kan ni. Ngaihsak leh duhsak hlawh ve lova kan inhriatna hmunah tu mahin phûr tak leh thatho

takin hna kan thawk thei ngai lo. Lal Isua rawngbâwlna a hlawhtlin chhan chu mi tê ber thlenga a ngaihsak peihna kha a ni. Member hlâte kan pawh hnaih theihna hmanrua, rawngbâwlnaa ãan hopui ãa taka kan chher theihna chu kan ngaihsakna hi a ni.

‘Ngaihsak’ tih hian mi thu leh hlâ ngaihthlâk leh ngaih pawimawh a kâwk tel a ni. Israel lalram a keh darh chhan kha Rehoboama’n hmâr lama chêng hnam sâwmte thu leh hlâ a ngaih pawimawh loh vâng a ni. (I Lalte 12:1-19) Dawhthei taka member-te thu leh hlâ ngaihthlâksak hi an thinlung hnehna hmanrua, ãan hopui ãa taka siam theihna a ni. Ringtu hmasâte kha an inngaihsak tawn tlat avângin an ãang ho ãa a, an rawngbâwlna a nung tlat a ni. Biak inah inhâwr khâwm ãa viau mah ila pâwn lamah kan inngaihsak zui loh chuan a kalh a kim lo. Kan inngaihsak zêl phawt chuan rawngbâwlnaa ãan ho kan thiam telh telh dâwn a ni.

2. Member-te mawhphurhna: BCM rawngbâwlnaa ãan ho kan thiam theih nâna member-te mawhphurhna tlângpui kan thlîr ve thung dâwn a ni.

2.1. Kohhran ta neihna: Ram tinin an khua leh tuite hamthatna an pêk rualin ram tâna an tih ve tûr an tuk nghâl ãhîn. Hamthatna dawn leh mawhphurhna hlen hi pawisa hmai hnih ang a ni a, ãen hnan theih a ni lo. Ram changkangah chuan khua leh tuiten sawrkârah chhiah tam tak an pe a, dân an zawm ãa a, an ãanho ãat avângin sawrkâr chu an ‘ta neih’ hlih hlih ãhîn a ni.

Kohhran member thenkhat chuan Kohhranin nau min hlansak a, bap̄tisma min chantîr a, chhiat ni that niah min tuamhlawm chuan kan duh tâwk mai a, Kohhran hmalaknaahte tel ve tum lovin kan thlîr mai mai fo thîn. Kohhran hi tute emaw an ni chuang lo va, Kohhran hming bu-a chuange hi kohhran chhûngkuaa mite vek kan ni.

Kohhrana kan tel chhan hi ‘malsawmna dawn’ ringawt a ni lo va, Pathian ram tân theihtâwp kan chhuah vena hmun tûr a ni. Eng pâwlah pawh neitu nihna rilru pu tlatte chuan pâwl tân theihtawp an chhuah thîn. BCM hi ‘ta neih’ thei tûr chuan BCM rawngbâwlnaah tha leh zung, sum leh pai sêngin theihtâwp kan chhuah theuh a ngai a, neitu rilru kan put tlat chuan tan ho kan thiam telh telh dâwn a ni.

2.2 Hruaitute thu zawm thiam: ‘Tanho thiam’ tih hian hruaitute thuawih tlânna a kâwk tel a ni. Hruaitute min hruaina rin ngam, an thuzawm thiam hi rawngbâwlnaah tan ho kan thiam zêl theihna atân a pawimawh a ni. Nehemia khân a chipuite kha Judai ram siam tha tûra thawhpuih a sâwm a. Mipuite chuan Nehemia hruaitu nihna (leadership) kha an pawm a, a thu an zâwm a, “I tho vang u khai; i din teh tak ang u,” tiin an tang ho tha a, hna ropui tak an thawk ta a ni. BCM hmalâknaah kan hruaitute thu kan zawm a, kan lungrual zêl phawt chuan rawngbâwlnaah tan ho kan thiam telh telh dâwn a ni.

2.3. Hruaitute thurâwn pêk: Hruaitu ropuite phenah hian thurâwn petu tha an inphum thîn.

Rawngbawl na hi thlarau lam thil a nih avângin Kohhrana hruaitu nihna chelhtute hi khawvêl thlîrna dâna a fîng leh fel ber ber an ni kher lo vang. Pathianin Kohhrante kal tlanga khawngaih rawngbâwl hna (hruaitu hna) a kawltîrte an ni. Hruaitute hian sawisêltu ringawt ni lo vin vênpuitu leh thurâwn petu an mamawh thîn. Pathian ram tân tum thuhmun, kawng khat zawh kan nih avângin tha nia kan hriatah chuan thurâwn pêk hreh lo ila, an fel tawk lohnaah pawh hliakhkuha duhsakna nêh thurâwn kan pêk thîn chuan rawngbâwl naa tan ho kan thiam zêl ang.

Tlângkawmna: Isua khan a zirtîrte kha a rawngbawl hna chhunzawm tûrin a buatsaih a. Rawngbâwl naah an tanho thiam a ngai hlê dâwn tih a hria a, tang ho thiam tûra an inpumkhat theih nâna humhim tlat tûrin Pathian hnênah a ngensak a, vawiina kohhranhote tân pawh hian min ngensak a ni. Lal Isuan min ngensak ang hian inpumkhatna tha tak nêh rawngbâwl naah kan tan ho thiam phawt chuan Pathian ram tân BCM hian hmalam a pan zêl thei dâwn a ni.

Sawi ho tûrte:

1. BCM rawngbâwl naah tan ho kan thiam lehzual theihna tûra tul nia kan hriatte (zirlai bua tarlan bak) sawi ho ni se.
2. Kohhran member-te hi kan inngaihsak tha tâwkin kan hria em? Inngaihsakna kawngah tûn aia hma kan sâwnna tûr nia kan hriatte sawi ho ni se.



ZIRLAI SAWMNA

KOHHHRAN LEH THILPÊK

Bible chhiar tur: *2 Korinth 9:7 Mi tinin ui chung a pe lovin, pêk loh theih loh anga ngaia pe hek lovin, an thinlunga an tum ang zêlin pe theuh rawh se; Pathian chuan hlim taka petu a ni a hmangaih ni.*

Thuhmahruai: He khawvêla chhûngkaw hmasa ber Adama-te chhûngkaw member Kaina leh Abela te unau chuan an thil deh chhuah aţangin Pathian hnenah thilpek an hlân a. Pathian hnêna thilpek hlan chu tih dan phungah nei chho zêlin vawiin thleng hian rawngbâwna pawimawh tak a ni ta a ni.

Pathianin Israelte chu a mi atân a thlang a. An thil deh chhuah zawng zawng aţanga sâwma pakhat pe tûrin a phût a. “Ram chhunga mi, sâwma pakhat zawng zawng, lova thil hâwngte pawh, thei rahte pawh LALPA pual a ni a, LALPA tana thianghlim a ni.” (Lev 27:30) tiin sâwma pakhat chu LALPA pual a nih avângin Pathian hnenah pe tûrin a hrilh a ni. Israelten Pathian rawng an bâwnaah sâwma pakhat pêk hian hmun pawimawh tak a luah a ni.

Pathianin sâwma pakhat pêk hi a ngai pawimawh hle a, Bible-ah hian vawi 33 lai târ lan a ni. ‘LALPA pual, LALPA tâna thianghlim a nih avângin dik taka tih hran tûr a nih thu te, sawma pakhat pêk hi malsawm dawnna a nih thu leh pêk duh loh leh pêk dik loh chu thupêk awih lohna, ‘Pathian ta rûksak’ anga ngaih an nih thute kan hmu a. Hagaia leh Malakia hun laiin Pathian ram tâna thilpêk an ngaihthah avângin zilhhau an tâwk hial a ni.

Kohhran leh thilpêk: Kohhran rawngbâwl na pawimawh tak chu thilpêka rawngbâwl hi a ni. Rawngbâwl naah hian tih tûr a tam hle a. A nawlpuia hma lak vek theih loh chin a awm avângin hun puma rawngbâwl hna thawktu tûr rawih a ngai thîn a ni. Kohhranin rawngbâwl hna a thawh theih nân leh rawngbâwl hna thawk tûra a rawihte enkawl nân kohhran member-ten Pathian ram thilpêk kan pêk a ngai a. Kan thilpêk chu ‘Pathian ram zauna (PRZ)’ tiin kan sawi thîn a, pawisa faia kan pêk te, loneituin a buh thar aṅga a pêkte leh a dang te pawh a huam vek a ni. Thilpek chungchang hi tawi tē tēin kan chhui chhunzawm dāwn a ni.

- 1. Sâwma pakhat kan pe ve ang em?** ‘Kohhranhoten sâwma pakhat kan pêk ve a ngai lo. Israelte hnêna thupek alâwm. Thuthlung Tharah sâwma pakhat pe tûra zirtîrna a awm lo’ ti pawl kan awm thîn. Lal Isua zirtirnaah sâwma pakhat pêk a ngaih tawh loh thu kan hmu lo va, Pathian ram tân thilpêkah theihtâwp chhuah tûrin min zirtîr zâwk a ni. AD 599-a Saville inkhawmpui chuan, “Miin thil engkimah sâwma pakhat a pêk loh chuan Kaina’n a pêk dik loh vanga Pathian ânchhia kha a chungah awm ve rawh se,” tiin thu an dah a. Wayne Grudem-a chuan, “Pathian thuin min zirtîr angin Kristiante chuan hlim takin, hun bi nei takin, kalphung fel tak neiin, dik takin, phal takin Pathian ram tân an pe tûr a ni,” a ti bawk.

BCM Constitution bung 4-naah chuan ‘Pathian ram tâna thilpêk sâwma pakhat (tithe=tait) pe ngei tura beisei a ni’ tiin member-te mawhpurhna târ lan a ni a. BCM member chuan sâwma pakhat kan pe ngei tur a ni. Pathian rawng kan bawl na hi thlarau lam thil a ni a. Thilpêk chungchangah

pawh ‘dân ang taka hlen chhuah’ tumna ringawt aiin ‘Pathianin Krista thisena a lei, Pathian fa ka ni a. Pathian tâna ka pêk hi Pathian rawng ka bawlna, Pathian laka ka mawhphurhna a ni,’ tih hi kan pêk chhan pâwimawh zâwk tûr chu a ni.

2. Khawiah nge kan pêk ang? Israelten Pathian inah sâwma pakhat zawng zawng an la khâwm thîn ang khân Kohhran member-te chuan kan thilpêkte hi kohhranah kan pe lut ngei tûr a ni. Sâwma pakhat hi LALPA pual, LALPA tâna thianghlim, LALPA tâna tihhran ngêi tûr a ni. ‘Mi harsa zâwkte hnêna kan pêk pawh hi rawngbawlna tho alawm’ tia ngaih pawimawhna lama pêk ngawt a rem lo va, Pathianin a hauh tlat avângin Pathian inah (kohhranah) ngei pêk tûr a ni.

3. Eng vangin nge thilpêk kan pêk ang? Pathian ram tâna thilpêk kan pêk chhan tûr lo thlîr ho leh ta ila.

3.1 Pathian hnêna lâwmthu sawina a ni: Sâm ziaktu chuan, “Ka chung a thiltih that zawng zawng avâng hian LALPA chu eng nge ka pêk ve thung ang?” (Sâm 116:12) tiin a inzawt a ni. Israelten Pathian hnêna thilpêk an pêk chhan langsâr tak chu Pathianin malsâwmna tinrêng a vûr avânga Pathian hnêna lâwmthu an sawina a ni. Kohhranhoten thilpêk kan pêk chhan pawh a thlâwna chhandamna min pêk avang leh malsâwmna tam tak min vûr avânga Pathian hnêna lâwmthu kan sawina a ni.

3.2. Pathian hmangaihna chhân lêtna a ni: Pathian ram tâna kan pêk hi Pathian min hmangaihna kan chhân lêtna a ni. Paula chuan, “Mi tinin ui chung a

pe lovin, pêk loh theih loh anga ngaia pe hek lovin, an thinlunga an tum ang zêlin pe theuh rawh se; Pathian chuan hlim taka petu a ni a hmangaih ni,” tiin leibâ tlâkna anga pe tûr kan ni lo va, hlim tak, phal tak, lâwm taka pêk chu Pathian hmangaihna kan chhân lêtna a nih thu a sawi a ni. Pathian kan hmangaihna hian mawhphurhna a keng tel a, chu mawhphurhna kan hlen chhuahna kawng pawimawh tak chu Pathian hnêna lâwm taka thilpêk kan hlan hi a ni.

3.3. Pathianin a tâna kan pêk a phal avângin lâwm taka pe tûr kan ni: Pathian hian a ram zau zêlna atân hian hmanrua a ngah êm êm a. Keini hian Pathian ram tân pe phal lo pawh ni ila phal taka petu tûra din chhuak mai ang. Pathianin a tâna kan pêk ve a phal avang hian lâwm takin kan pe tur a ni. Andrian Rogers-a chuan, “Pathian hian kan pawisa hi a mamawh tihna a ni lo. Amah chu engkim neitu a ni. Mahse rinnaa kan thanlen zêl nân a hnena pêk hi a phal a ni,” tiin a sawi a ni.

3.4. Malsâwm dawnna a ni: Pathian hnena thil pêk hi Pathianin a mite hnena malsâwmna a luan luhtîrna kawng pawimawh tak a ni. Thuthlung Hluiah chuan malsawmna tam tak min vur theihna turin sâwma pakhat hmanga fiah tûrin min hrilh hial a ni. (Mal 3:10-12) Lal Isua chuan, “Pe rawh u, chutichuan pêkin in awm ang, thahnemngai taka teh a, beng muk a, sawi muk a, liam zawih zawihin, in mal chungah an pe ang che u. In tehma ngai bawkin an tehsak leh dâwn si che u a,” (Luka 6:38) tiin. Pathian hnena thilpek kan thatpui turzia min hrilh a ni. Peter Marshall-a chuan, “I lak luh ang zêlin Pathian hnenah pe

rawh. Chuti a nih loh chuan i pêk ang mil zêlin Pathianin a lak luhtîr mai tûr che a nia,” tiin a sawi a, fuihna tha tak leh awmze nei tak a ni.

Paula chuan, “Theh tlêm chuan a ât tlem baw k ang a, theh tam chuan a ât tam baw k ang,” (2 Kor 9:6) tiin a sawi a. Carl B. Pratt-a pawhin, “Pathian ram tana pêk hi pawisa thu hla a ni ngawt lo, rinna chungchâng, Pathian kan rinna chungchâng a ni zawk. A thupêkte kan zawm chuan malsâwm min tiam a ni,” a ti baw k. Thinlung lam entu Pathian chuan kan thilpêk tam lam (amount) ni lovin Pathian kan hmangaihna avânga phal taka kan pêk ang zêlin tisa leh thlarauvah mal min sawm dâwn a ni.

3.5. Vana ro khawl khâwmna a ni: Lal Isua chuan he leiah ro khawl khâwm lova vana ro khawl khâwm zawk tûrin min hrilh a. (Matth 6:19-21) He khawvêla rote hi chu an la ral vek dâwn bâkah sum ringawt buaipuitu chu sum ‘bâwiah’ tângin buaina tam takah a inhnûk lût thîn a ni. Chutiang mi, mahni tâna sum khawla Pathian lama ngah si lo chu Pathian thu chuan ‘Mi â’ tiin a ko hial a ni. (Luka 12:20-21)

Pathian tâna kan pêk hi vana ro kan khawl khâwmna a ni. Isuan, “I ro awmna apiangah i rilru pawh a awm ang,” a tih angin Pathian tâna phal taka petute chuan vân lam thil an tuipui a, an nun a hlim thîn. Chu chu ringtute tân a hlu êm êm a ni.

4. Hma i sâwn zel ang u: Kum 2024-2025 chhûnga kohhranhoten kan pêk tûra beisei (Target) chu cheng nuai sawmriat chuang laiin kan khûm a ni. Oswald J. Smith-a’n, “Tûn hma aia ka thilpêk ka thipun chuan Krista tâna hneh zêl tûra hma thar

lâk zêl ka duh tihna a ni,” a tih angin thilpêkah hma sâwn zêl tum ila, sâwma pakhat la pe lote pawhin pêk i tum theuh ang u.

Tlangkawmna: Pathian ram tâna thilpêk hi Pathian chibai bûkna, rawngbâwlina tangkai, Pathian nêna kan inlaichinna tinghettu, rinnaa kan thanlen zêl theihna atâna pawimawh a ni. Chuvângin, phurritah la lovin, kan theih ang tâwk theuhvah hlim tak leh phal takin i pe zêl ang u.

Sawi ho tur:

1. Pathian ram tâna thilpêk pêk harsa kan tih chhan ni âwma langte sawi ho ni se. Hmasâwnna tûr nia kan hriatte pawh sawiho ni bawh se.
2. Pathian ram tâna kan thilpek avânga malsâwmna kan dawnte sawi ho ni se.



NOTE

This image shows a blank sheet of white paper with horizontal ruling lines. The lines are evenly spaced and run across the width of the page. There are no margins, text, or other markings on the paper.